

BS



2594


P 2

1908

A 547740

Bible. N.T. Luke. Pangasinan
Say Masantos ya Evangelio.






BS


2594

P2

1908



**PRESENTED BY
THE SOCIETY**





Bible. N.T. Luke. Pangasinan.
1908.

SAY MASANTOS YA EVANGELIO

ONO MAONG Á BALITA

NA

CATAOAN TAYON JESU-CRISTO

ONONG NA INSULAT NEN

LUCAS.



MANILA

SOCIEDAD BÍBLICA BRITÁNICA Y EXTRANJERA
117 CALLE REAL, ERMITA

1908

THE GOSPEL OF SAINT LUKE IN PANGASINAN

BRITISH AND FOREIGN BIBLE SOCIETY, LONDON, ENGLAND

PRINTED BY THE FUKUIN PRINTING Co., LTD., KOBE

6-20-18, M.C.

SAY MASANTOS YA EVANGELIO

ONO MAONG Á BALITA

NA

CATAOAN TAYON JESU-CRISTO

ONONG NA INSULAT NEN

L U C A S.

Pangigapoan.

1 BANGTA daquel so nanguetman angocsoy na saquey á pangolitat saray buengatlan pinatuan pueteg á nasnaspot ed sicutayo,

2 onong na inpangosaosad sicami na saramay nanlapud inmuna tasirad mata tan catangbayad salita,

3 ninonotco muet á macapaabig, cayari inpangepapuetcon maong ed amindaray agaoan nanlapud inmuna, ya isulat á maococsoy ed sica, sancacanaan á Teófilo ;

4 pian nacabatanmoy catuaandaray agaogaoa á sicaray aca-pangibangata sica.

Say nipacabat á quianac nen Juan.

5 Oala diad saramay agueo nen Herodes, arid Judea, so saquey á sacerdote á manngaray Zacarías, diad nengneng nen Abías ; et say asaoato saquey ed saray anac nen Aarón, et say ngaranto Elizabet.

6 Et matonong iran dua ed arap na Dios, á nanacad iran andi binalao ed sicara diad ganaganay gangan tan bilin na Cataoan.

7 Et angapoy anacda, ta si Elizabet lepues, et matatquen laran dua ed taon.

8 Et agaoa á sanen pueleston mancacatangbayan á singa sacerdote diad arap na Dios, onong ed incabtangto,

9 singa ugalid incasacerdote, tinuroy capalaran ya onloob ed Templo na Cataoan á mangibagat na incienso.

10 Et ami caraclanday ombalèy oalad paoay á micacascasi leleg na bagat na incienso.

11 Et pinmayaoad ed sicato so saquey ya angel na Cataoan, á manalalaguey ed caoanay altar na incienso.

12 Et apagaan si Zacarías nen anengnengto, et aselepay tacot.

13 Balet incuay angel ed sicato: Zacarías, agca antacot, ta nadngel so picacasim; et si asaoam ya Elizabet mananac ed sica na saquey a laquí et taoaguenmoy ngaranto á Juan.

14 Et manliquet tan ongayagaca, tan daquel so napaliquet ed quianacto:

15 ta baleg naanid arap na Dios; et ag oninum na alac tan inumen á mabayani; et napanoy Espiritu Santo á manlapud egues nen inato.

16 Et daquel ed saray anac nen Israel so panpataolientorad Dios á Cataoan da.

17 Et manacad naanid arapto, onong ed linaoa tan casil nen Elías, pian nabiectoray capusoanday atateng ed saray anac, et saray matulay pañacarentora diad cacabatan daray matonong, pian itadiaantoy Cataoan na saquey á baleg a maralato.

18 Et incuan nen Zacarías ed samay angel: ¿Antoy paca-patnaganco nia? ta masiquenac la, et si asaoac matatquen muet lad taon.

19 Et inmebat so angel á cuantod sicato: Siac si Gabriel á manlilingcod ed arap na Dios; et nibaquiac á misalitað sica tan mangited ed sica na sarayan maong á balita.

20 Et nia, naomelca es agca macasalita angad agueo á casungpalto nia, lapud agmo sinisiaray salitac á sicaray nasungpal sano canepueganto.

21 Et saray ombaley pialagadday Zacarías et manquelao irad inpantantantod Templo.

22 Et nen pinmaoay agto ayariay aquisalitað sicara; et naamtaanda ya acanengneng na saquey á pasingaoey diad Templo, ta aquisalitaantorad andaoes; et naomel.

23 Et agaoa, á sanen linmabas iray agueo ya inpancatang-bayanto, linmad abungto.

24 Et cayari saraman ya agueo, nanlocon si asaoaton Elizabeth, et nanamot á limay bulan, á cuanto:

25 Ontay guinaoad siac na Cataoan ed saray agueo ya in-pangimatonto ed siac, pian naecal so cabandayanco ed arapday totoo.

Say nipacabat á quianac nen Jesús.

26 Et diad comanem á bulan, si angel Gabriel inbaqui Dios ed saquey á ciudad na Galilea á manngaray Nazaret,

27 diad saquey á virgen ya aquiaseoad saquey á laqui á manngaray Jose, tobó diad abung nen David; et say ngarantonmay virgen, María.

28 Et linmoob so angel ed samay caoalaanto et incuanto; ¡Ave, nasnaspot na pamalangcap! Say Cataoan oalad sica; (mapaladca ed saray bibii.)

29 Balet sicato apagaay baleg, lapud sayan salita, et inisisipto no antoy cabalicsanto nian panangigalang.

30 Et samay angel incuantod sicato: María, agca antacot, ta acaromogcay pamalangcap ed arap na Dios.

31 Et nia, iloconmo tan yanacmoy saquey ya anac á laqui et ingarananmo na ngaran á Jesús.

32 Sicato balbaleg, et ningaray Anac na Sancataguian; et ited na Dios á Cataoan ed sicato so trono nen David ya amato;

33 et manari laoas ed abung nen Jacob; et say panarianto andi angato.

34 Et incuan nen María ed samay angel: ¿Panon nia, ta agco cabat so laqui?

35 Et innebat imay angel á nancuad sicato: Say Espiritu Santo onlad sica, et say pacapaniari Sancataguian sanibantoca; canian say Santo ya ontoo ningaran naani Anac na Dios.

36 Et nia, si Elizabet á canayonmo nanlocon muet diad incaacolaoto na saquey ya anac á laqui, et sayay comanem á bulan ed sicato ya inngaran á lepues.

37 Ta diad Dios angapoy salita ya agnayari.

38 Et incuan nen María: Nia lay aripuen na Cataoan; nagaoad siac ed onong na salitam. Et samay angel tinmainad sicato.

Si Maria dalaoento si Elizabet.

39 Diad saraman ya agueo inmalaguey si, María et linman maganganat et capalandeyan, diad saquey á ciudad na Judá;

40 et linmoob ed abung nen Zacarías tan inbanotoy Elizabet.

41 Et agaoa á sanen nadngel nen Elizabet so inpangibano nen María guinmalao su ugao diad eguesto; et si Elizabet napnoy Espiritu Santo;

42 et incasiltyo vocesto á tinmaoag á cuanto: ¡Mapaladcad biin amin tan benditoy bungay eguesmo!

43 ¿ Et inedco agamoran nia á say inay Cataoanco onla diad siac?

44 Ta casabi tanol na panangibanom diad layagco, lapud gayaga guinmalao diad eguesco.

45 Et mapalad so anisia, ta nasungpal iray inpaipacabat ed sicato na Cataoan.

Pananigalang nen Maria.

46 Et incuan nen María:

Igalang na camareruac so Cataoan;

47 Tan say espírituc manliquet ed Dios á Manangilabanco;

48 Ta ninengnengtoy caabuebaan na aripuento;

Ta nia, manlapud natan ingarandaac na mapalad na ganaganay cailalacan.

49 Lapud guinaoad siac na Macapaniari so ancacabaleg iran buengatla;

Ta Santo so ngaranto.

- 50 Et say panangasito nipaacad ed ilalacday cailalacan
Diad saray antacot ed sicato.
- 51 Impatnagtoy pacapaniarito ed taclayto:
Binuyactoray ataguey á linaoa diad canonotay capusoanda,
- 52 Inecaltoray principe diad saray tronora,
Et intan dorotoray mapaabueba.
- 53 Saray narasan pineseltorad cayarian
Et saray mayaman pinatainantoran andi iyan.
- 54 Tinulongantoy Israel ya aripuento,
A sancanono'toy panangasi á nisipan
- 55 (Onong na sinalitatod saray atateng tayo)
Et Abraham tan say binito laogas.
- 56 Et nanayam si María diad sicato na taloy bulan; insan
pinmaoil ed abungto.

Inquianac nen Juan Bautista.

- 57 Et asabi agueo á pananac nen Elizabet, et nananac
na saquey á laqui.
- 58 Et nadngelanday caababay tan cacamayonda á say Dios
guinaotod sicatoy baleg á panangasito, et aquiliquet irad
sicato.
- 59 Et agaoa á diad comaoalon agueo nilaran guinalsimay
ugao, et ipangaranda comod sicato so ngaran nen amato á
Zacarías.
- 60 Et inmebat si inato á cuanto: Andi; no ag inguen ingaray
Juan.
- 61 Et cuandad sicato: Angapod cacamayonmoy manngaray
saya.
- 62 Et inanandaoesanday amato, no antoy labayton ipangar-
an.
- 63 Et quinmereo na tabla et insula'ton cuanto: Juan so
ngaranto. Et niquelaoan iran amin.
- 64 Et tampol abuesoat so sangito tan naocbaray dilato, et
nansalitan angigalgalang ed Dios.
- 65 Et sinmabi tacot ed ganaganay caababayda; et quinmayat
ed lapag á capalandeyay Judea so amin irayan buengatla.

66 Et amindaray acadngel iranias, inyandarad capusoandan nancuan : ¿Anto casi'ya naanin ugao ? Et say limay Cataoan oalad sicato.

Panangilalang nen Zacarias.

67 Et si Zacarias ya amato napnoy Espiritu Santo, et inprofetaton nancuan :

68 Nagalang comon so Cataoan, say Dios na Israel ;
Ta dinalao tan guinaoatoy panangilabad baleyto.

69 Tan pinaalagueytod sicutayoy saquey á sacloð na panangilaban.

70 (Onong na insalitatod sangiray masantos á profetasto á nanlapud inmuna,)

71 Panangilaban diad saray cabusol tayo, tan diad limaray mangulad sicutayo ;

72 ya inagamiltay panangasid saray atateng tayo, Tan sinonot ed masantos á sipanto :

73 Say samba á sinambaantod Abraham ya ama tayo,

74 A sicato, diad quilaban tayod limaray cabusol tayo, ited-tod sicutayo

So panlingcod tayod sicato, ya andi tacot,

75 Diad casantos tan caalasan ed arapto ed amin ya agueo tayo.

76 Et sica, ugao, ningarancan profetay Sancataguian ;

Ta onlacad arap na Cataoan, pian itadiam iray dalanto ;

77 Ya ipacabatmoy quilalaban ed báleyto,

Diad pamaandid saray casalananda ;

78 Lapud mantel á panangasi Dios tayo,

A sicutay panalaoad sicutayo na Banoan onpuepuelnac, ya onacseb manlapud taguey,

79 Pian mangited na liooad saray maniorong ed cabilungtan tan aninoy ipapatey ;

Pian mangitontod saray sali tayo ed dalay careenan.

80 Et say ugao onbabaleg tan onbibisueg ed espiritu ; et nanayam ed calaoacan angad agueo ya inpatnagtod Israel.

Inquianac nen Jesu-Cristo.

2 ET AGAOAD saraman ya agueo ya inmacseb so saquey á gangan nen Augusto Cesar pian nipadron so ganaganay dalin á natotooan.

2 Sayan incapadron agaoan inmuuna sanen gobernador ed Siria si Cirenio.

3 Et linmaran amin ya inpaipadron balang saquey ed ciudadton dili.

4 Et si José, nanlapud Galilea, ed ciudad á Nazaret, linmad Judea, ed ciudad nen David á manngaray Bet-lehem, (lapud tinmubo ed abung tan cailalacan nen David) ;

5 pian paipadron pati si Maria ya asaoato á sicutoy malocon nen saman.

6 Et agaoa á sanen oadman ira asabi la ray agueo á panacton.

7 Et inyanacto so anacton pangoloan, et pinonggostod lampin, et inparocoltod saquey ya atotong ; ta angapoy napase-nandad daraoesan.

Saray pomapastol dimad Bet-lehem.

8 Et oalaray pomapastol ed saman á dalin, á manaayam irad uma diad patactac, á babantayandan andi uguipan so ayayepda.

9 Et saquey ya angel na Cataoan nanalaguey ed abayda, et say gloriay Cataoan nilictobtora na lioaoa ; et apagaan iray baleg á tacot.

10 Et samay angel incuantod sicara : Agcayo antacot, ta nia, ipacabatcod sicayoray maong á balita ed baleg á liquet á nipaa-cad ed ami baleg na Dios ;

11 ta natan, diad ciudad nen David, nianac ed si cayoy saquey á Manangilaban, salanti Criston Cataoan.

12 Et sayay tandad sicayo : Naromogyoy ugao ya apunggos ed lampin tan niparocol ed saquey ya atotong.

13 Et casanlilicnan oalay aquiolop ed samay angel á saquey á caraclan na ejerciton mangataoen ya anġigalgalang ed Dios á cuanda :

14 ¡ Gloriad Dios diad sancataguian,
Tan diad dalin deen,
Tan maong á linaoad saray totoo !

15 Et agaoa á sanen sicaray tinainan na saramay angel diad inacaddad taoen, saray pomapastol nansasalitara á cuanda : Onla itayo, sirin, angad Bet-lehem, et nengnengentayo'yan agaoa ya inpaipacabat ed sicutayo na Cataoan.

16 Et linmaran maganganat, et aromogda si María tan José tan samay ugao ya acarocol ed atotong.

17 Et nen anengnengda, inpacabatday balitan niited ed sicara nipaacad ed sayan ugao.

18 Et amindanmay acadngel, nanquelao irad saray inbagad sicara na saramay pomapastol.

19 Balet si María inememantorayan amin ya agaoa á ninon-notod pusoto.

20 Et pinmaoil iramay pomapastol ya ingalgalang tan intan-tandororay Dios lapud saray amin á nadngel tan anengnengda, onong na nipacabat ed sicara.

Inpanġalsim tan inpanġipatnag ed Jesús.

21 Et nen linmabas so oaloran agueo lan panġalsim ed ugao, inngaranday ngaranto á Jesús, á sicutoy inyan na angel nen ag ni nilocon diad egues.

22 Et nen asungpa'laray agueo muet na pangogol nen María, onong na gangan nen Moises, inyacadda so ugao diad Jerusalem ya inpatnag ed Cataoan.

23 (onong na oalan nisulat ed gangay Cataoan : Amin á laquin mangilucas na egues,* ingaray santo nipaacad ed Cataoan).

24 et mangiapay na bagat, onong na nibaga ed gangay Cataoan : Duaran palecpec ono duaran malapati á sibong.

* Labayton ibaga : say laquin ononan nianac.

Si Simeón tan si Ana.

25 Et nia, oalay saquey á laquid Jerusalem á manngaray Simeón ; et sayan toon matonong tan mapangaco aalagdentoy liglioay Israel ; et say Espiritu Santo oalad sicato.

26 Et inpuayay Espiritu Santo ed sicato ya agto nanengneng so ipapatey no agto ni nanengneng so Cristoy Cataoan.

27 Et lapud Espiritu linmoob ed Templo. Et nen inloobday Jesús na atatengto diad templo, pian gaoaendad sicato onong na caugaliay gangan,

28 nen saman inalatod taclayto, et ingalgalangtoy Dios, et incuanto :

29 Natan pasipotmo, Cataoan, yay aripuenmo

A mareereen, onong na salitam,

30 Ta anengneng daray matac so Panangilabanimo,

31 A sicutoy intadiam ed arap na aminday totoo ;

32 Sileo á nipatnag ed saray Gentil

Tan galang na baleymon Israel.

33 Et si amato tan inato niquequelaoan irad saramay nasasalitan nipaacad ed sicato ;

34 et binendicionan ira nen Simeón, et diad quienen María ya inato, incuanto : Nia, sayan ugao nigaton pian cagapolan tan quialagueyay daquel ed Israel, tan pian tanda á sungpaenda :

35 (et saquey ya ayura talosentoy camareruam,) pian nipatnag so canonotay daquel á capusoan.

36 Et oalay saquey á profetan manngaray Ana, biin anac nen Fanuel ed poli nen Aser ; acolaolan maong et pitoy taon ya aquiamong ed asaoato nanlapud incamariqui'to,

37 et abalo ya oalonpolo tan apat taon la, et ag la onaalis ed Templo á manlilingcod ed Cataoan diad labi tan agueo, diad panagayunal tan picacasi.

38 Et nen sinmabi'yad saman á dilin horas, aquisalamat ed Dios, et nansalitay nipaacad ed ugao diad saray amin á manaa-lagad na carondoy Jerusalem.

39 Et nen asungpaldalan amin onong ed gangay Cataoan, pinmaoil irad Galilea, ed ciudad á Nazaret.

40 Et samay ugao binmaleg tan quinmasil, tan napnoy cacabatan ; et say graciay Dios oalad sicato.

Si ugao á Jesús diad pegleydaray macacabat.

41 Et tinaontaon ya onlaray atatengto diad Jerusalem ed fiestay Pasco.

42 Et nen mantaoy labindua linmara onong na ugali diad fiesta ;

43 et nen linmabas larayan agueo, nen ompaoi'lara, atilac si ugao á Jesús diad Jerusalem, ya ag cabat nasaray atatengto ;

44 et lapud ilaloandan olan niolop, nanacad irad leleg na saquey agueo, et inaanapdad saray cacanayon tan cabcabatda ;

45 bang nen agda balet naromog, pinmaoil irad Jerusalem á nananap ed sicato.

46 Et agaoa á nen linmabas so taloy agueo, nalmorad Templo, á manyodyorong ed puegley daray macacabat, ya onde-dengël tan ontetepuet ed sicara ;

47 et saray acadngel ya amin ed sicato manquelquelao ira ed catodioay nono'to tan diad saray eba'to.

48 Et nen anengneng da la, niquelaoan ira, et incuad sicato nen inato : Anac, ¿aquit ontay guinaoam ed sicami ? Nia, si amam tan siac inaanap dacan maedermen.

49 Et sicato inmebat ed sicara : ¿Aquit inaanapyoac ? ¿Agyo amta á nepuegcon imatonan so saray cayarian nen Amac ?

50 Balet agda atalosan so saramay salitan inbagatod sicara.

51 Et linman aquiolop ed sicara et sinmabid Nazaret, et tompotomboc á matolotoloc ed sicara. Et si inato, inememantorayan amin á nasasalita diad pusoto.

52 Et si Jesús binmaleg ed cacabatan tan cabalgan, tan diad pamalangcap na Dios tan saray totoo.

Inpanpolpolong nen Juan Bautista.

3 ET sanen taon á comalabinlima ya incaari nen Tiberio Cesar, nen pueles á gobernador ed Judea si Poncio Pilato, et si Herodes, tetrarcad Galilea, et si aguiton Felipe, tetrarcad Iturea tan diad provinciay Traconite, et si Lisantias, tetrarcad Abilinia,

2 manonan sacerdote balet di Anas tan Caifas, sinmabi salitay Cataoan ed Juan, anac nen Zacarías, diad laoac.

3 Et sicato linmad ganaganay dalin ed calibuedlibued na Jordan ya angipolpolong na biniag na panpataoli nipaacad ed pamaandid saray casalanan ;

4 onong na oalan nisulat ed libroray salita nen profeta Isaías á cuanto :

Voces na saquey á manqueliao diad laoac :

Itadiayo so dalan na Cataoan,

Puetequenyoray basbasto.

5 Saray abueban dalin tagueran ira

Et amin á palandey tan pacdol palanasen ira ;

Et say piqueoet napuetec,

Et saray dalan á matibagcol napatad ira :

6 Et amin á laman nanengnengtoy panangilabay Dios.

7 Et cuantod saray daquel á toon pinmaoay á pabiniagad sicato : Oh capoliandaray uleg, ¿ siopay angibangat ed sicayo ya onbatic ed sanoc ya onsabi ?

8 Mangaoacayo, sirin, na bungabungan manepueg ed pagbabaoi, et agyo gapoan ya icuad linacayon dili : Oala si Abraham á panagcaamami ; ta cuancod sicayo á nayariay Dios so mamaalagüey na saray anac ed quienen Abraham angan diad sarayan bato.

9 Et natan muet lanlamang say oasay niyanlad lamut na saray quieo : amin á quieo sirin ya ag mangited na maong á bunga napopo et nibantac ed apuy.

10 Et saray daquel á too tinmepuet irad sicato á cuanda : ¿ Anto, sirin, so nepuegmin gaoen ?

11 Et inmebat ya incuantod sicara : Say oalay duaran caesto, iyapagtoy andian ; et say oalay canen, ontan muet so gaoento.

12 Et linma muet iray somisingil na buis pian pabiniagan ira, et incuandad sicato : Managbangat, ¿ antoy nepuegmin gaoen ?

13 Et sicato incuantod sicara : Agyo anapuen no ag say oalan nigangad sicayo lambuengat.

14 Et saray sondalo tinepuetda muet ed sicato, á cuanda : Et sicami, ¿ antoy nepuegmin gaoen ? Et incuantod sicara :

Ag cayo mangaoay damsac ed angan siopa, et agcayo mantilad ag canepuegan, et pisalamatanyoy upayo.

15 Et nen manaalagad iray catooan tan nonnonotendad capusoanday nipaacad ed Juan no casin sicato inguen so Cristo ;

16 inmebat si Juan á nancuan ed sicaran amin : Siac, tuanpueteg biniaganta cayo ed danum, balet onsabi lalon oalay pacapaniarito nen siac, sicato ya ag ac onnepueg á mangocbad na lubid na sapinto : sicato biniaganto cayo ed Espiritu Santo tan apuy ;

17 say paypayto oalad limato, pian panisanton maong so taltaganto tan pian tiponentoy trigo diad camalidto, balet say taep poolantod apuy ya ag naerep.

18 Et pati daquedaquel nin arum á bangat, inpolongtod saray totoo so saray maong á balita ;

19 balet si Herodes á tetrarca, sanen binalao nen Juan nisengeg ed quienen, Herodias á biin asaoay aguito, tan lapud amin á caugsan á guinagaogaoa nen Herodes,

20 inyarumto muet nia ed saray amin, ya in pococtoy Juan diad panangipangaoan.

Inpanbiniag nen Jesús.

21 Et agaoa á sanen abiniagan iray amin á totoo, inpabinia-gan muet si Jesús, et nen pueleston micascasi, say taoen nilucas,

22 et inmacseb ed sicutoy Espiritu Santo á silalaman á singa malapati, et oalay voces á nanlapu ed taoen á cuanto ; Sica so Ana'con inadaro, diad sica napaliquetac.

Incapoli nen Jesús

23 Et si Jesús á dili, nen guinmapo á nanpolpolong, mantaoy talompoló, et anac (onong na sisiaen) nen José, anac nen Eli,

24 ya anac nen Matat, ya anac nen Leví, ya anac nen Melqui, ya anac nen Jané, ya anac nen José,

25 ya anac nen Matatias, ya anac nen Amos, ya anac nen Nahum, ya anac nen Esli, ya anac nen Nagé,

26 ya anac nen Maat, ya anac nen Matatías, ya anac nen Semei, ya anac nen José, ya anac nen Juda,

27 ya anac nen Joana, ya anac nen Resa, ya anac nen Zorobabel, ya anac nen Sealtiel, ya anac nen Neri,

28 ya anac nen Melquí, ya anac nen Adí, ya anac nen Cosam, ya anac nen Elmodam, ya anac nen Er.

29 ya anac nen Josué, ya anac nen Eliezer, ya anac nen Torim, ya anac nen Mata, ya anac nen Leví,

30 ya anac nen Simeón, ya anac nen Judá, ya anac nen José, ya anac nen Jonán, ya anac nen Eliaquim,

31 ya anac nen Melca, ya anac nen Mena, ya anac nen Matata, ya anac nen Natan, ya anac nen David,

32 ya anac nen Isaí, ya anac nen Obed, ya anac nen Booz, ya anac nen Salmón, ya anac nen Naasón,

33 ya anac nen Aminadab, ya anac nen Aram, ya anac nen Esrom, ya anac nen Farés ya anac nen Judá,

34 ya anac nen Jacob, ya anac nen Isaac, ya anac nen Abraham, ya anac nen Taré, ya anac nen Nacor,

35 ya anac nen Serug, ya anac nen Ragan, ya anac nen Peleg, ya anac nen Heber, ya anac nen Selah,

36 ya anac nen Cainan, ya anac nen Arfaxad, ya anac nen Sem, ya anac nen Noe, ya anac nen Lamec,

37 ya anac nen Matusalem, ya anac nen Enoc, ya anac nen Tared, ya anac nen Mahalaleel, ya anac nen Cainán,

38 ya anac nen Enós, ya anac nen Set, ya anac nen Adam, ya anac na Dios.

Say pananocso.

4 ET si Jesús á napnoy Espiritu Santo, pinmaoil á nanlapud Jordan, et inyacad na Espiritu diad laoc,

2 á *nanayam diman* ed apat á poloy agueo, et tocsoen oari Diablo. Et angapoy quinantod saraman ya agueo; et nen apalabas laraya, insan naerasan.

3 Et say Diablo incuantod sicato » No sicay anac na Dios, ibagam ed sayan bato á magmalio á tinapay.

4 Et si Jesus inmebat ed sicato á cuanto: Oalan nisulat: Alia lambuengat á tinapay so panbilay na too, (no ag inguen amin á Salitay Dios).

5 Et sicutoy inyacad na Diablo ed saquey ya ataguey á palandey et inpanengnengtod sicutod sancasicmat so amindaray panarian diad mundo.

6 Et incuad sicato na Diablo: Itedcod sica'yan amin á pacayari, tan say gloriadarania á *panarian*; ta niited ed siac, et itedcod labayco.

7 Canian, no micasicad arapco, cayarianmoran amin.

8 Et inmebat si Jesús et incuantod sicato: Oalan nisulat: Diad Cataoan á Dios mo micasica, et diad sicato lambuengat so panlingcoranmo.

9 Et inyacadtod Jerusalem et inyantod toctoc na Templo et incuantod sicato: No sicay Anac na Dios, ontaboyca manlapu'dia angad luepsag;

10 ta oalan nisulat:

Ibilintod saray angeltoy nipaacad ed sica pian talimaendaca;

11 Et sicay sacloyendad saray calimaanda pian ag niquenay salim ed bato.

12 Et inmebat si Jesús ed sicato á cuanto: Nibaga la: Agmo tocooen so Cataoan á Dios mo.

13 Et nen ayari la'rayan amin á pananocso, say Diablo tinmainad sicato ed loob na pigaran panaon.

Si Jesús apaaraoid Nazaret.

14 Et Si Jesús á napnoy pacapaniari Espiritu, pinmaoil ed Galilea, et quinmayat so dengelto ed ganaganay pasen á calibuedlibued.

15 Et sicato nanbabangat diad saray sinagogasda et indaydayeo na calapagan.

16 Et sinmabid Nazaret á dimay acaioianto; et linmoob, onong na ugalito, ed agueo na Sabado, diad sinagoga, et inmalaguey á nambasa.

17 Et initeddad sicutoy libro nen profeta Isaías, et nen binuscagto'may libro, aromogtoy pasen á nisulatay saya :

18 Say Espirituy Cataoan oalad siac ;

Ta nilanaantoac á mangited na saray maong á balita ed saray duca ;

Inbaquitoac á mangipacabat na quilaban ed saray araquet, Tan say pacanengneng daray bulag ;

Pian iboloscoray nanaaposan.

19 Pian nibaoag so taon á macapaliquet na Cataoan.

20 Et sanen niluco'tomay libro, initedtod samay catangbayan, et inmiorong : et say mataran amin diad sinagoga sinenengneng ed sicato.

21 Et guinmapon nancuad sicara : Diad sayan agueo asungpal ed calayaganyo'yan sulat.

22 Et pinatuaran amin et niquelaoan irad saray salitan matalongaring á nanlapud sangito, et cuanda : ¿Alioan saya'may anac nen José ?

23 Et incuantod sicara : Andi duarua ya icuanyo anganco ed siac so sayan alimbaoa : Mananambal, tambalmopa muet lanlamang so lamanmo : saray daquel á nadngelmin guinaoam ed Capernaum, gaoenmo muet diad baleymo.

24 Et incuanto : Tua cuancod sicayo ya angapoy profeta ya aotendad baleyto.

25 Balet tua á cuancod sicayo, á daquel nen saman so bibiin baló diad Isreal ed saramay agueo nen Elías nen nicaput so taoen ed loob na taloy taon tan anem bulan, et agaoay baleg ya eras ed amin á dalin ;

26 inguen angapod sicaray nibaquian nen Elías, no ag diad saquey á biin baló dimad Sarepta ed Sidon.

27 Et daquel nen saman so acating dimad Israel ed saramay agueo nen profeta Eliseo ; balet angapod sicaray atambal, no ag si Nahaman á taga Siria.

28 Et amindadmad sinagoga napnoray sanoc nen narengelda'ya ;

29 et inmalaguey ira et pinaa araairad paoay na ciudad et inyacaddan angad toctoc na palandey ya inalaguia ciudadda, pian sicutoy ibantaada comon.

30 Balet sicato nanacad ed puegleyda, et tinmainan.

Incatambal na aselepay demonio ed Capernaum.

31 Et linma ed Capernaum, saquey á ciudad na Galilea. Et ibabangatorad saman ed saray Sabado:

32 et panquelquelaoandad ibabanga'to, ta say salitato oalay pacapaniarito.

33 Et oalad sinagogay saquey á too ya oalad sicutoy saquey ya espíritun mabanday, et nanaquis ed baleg á voces:

34 ¡Dali! ¿antoy pibiangānmid sica, Jesus á Nazareno? ¿Linmacadian maneral ed sicami? Siac caba'taca no siopaca; salanti Sicay Santo na Dios.

35 Et sicutoy nanpasnocan nen Jesús á cuanto: Naemuelca, et ompaoay cad sicato. Et samay demonio, nen sicutoy inparcoltod puegley, tinmainad sicato, et agto naanon balot.

36 Et sinmabi quelao ed sicaran amin, et cuandan mansalalita: ¿Anto casi'yan salita? ta diad pacapaniari tan talongaringto ganganentoray espíritun mabanday, et ompaoay ira.

37 Et say dengelto quinmayat ed ganaganay pasen á calibuedlibued.

Incatambal na bii á catulanġan nen Simón.

38 Et inmaluey ed Sinagoga, et linmoob ed abung nen Simón: et say bii á catulanġan nen Simón asaquitay macsil á puetang; et aquicasian da lapud sicato.

39 Et inmabay ed sicato, et binanotomay puetang; et sicutoy tinainanto; et tampol inmaluey et nanopagad sicara.

40 Et nen onseselec so agueo, amindaray oalay mabueblay da ed antocaman á saquit, inacad darad sicato; et sicato diad pangiantoy limato ed balang saquey ed sicara, pinaabigtora.

41 Et pinmaoay muet iray demonio ed daqueraquel, á manakuisda et cuanda: Sicay Anac na Dios; inguen nanpasnocantora et agtora pinasalita; ta aintara á sicato si Cristo.

42 Et nen cabuasanla, tinmainan et linmad pasen ya andi-

too : et saramay daquel á too sicutoy inaanapda et linmaran angad caoalaanto, et pinocpocanda pian ag onaraoid sicara.

43 Balet sicato incuantod sicara : Diad saray arum á ciudad caocolan muet ya ipacabatcoy evangelioy panariay Dios ; ta sayay macasenġeg na nibaquianco.

44 Et nanpopolong ed saray sinagoga ed Galilea.

Say macapaquelao ya inpansigay.—Saray inmuunan binanġatan.

5 ET agaoa á nen mantitipon so daquel á totoo diad caoalaanto, pian denglenday salitay Dios, sicato oalan manalalaguey ed abay na libsong na Genesaret ;

2 et anengnengtoy duaran baloto ya oalarad asinggued ed guilig na Libsong ; balet saray sumisigay linmasod ira et inuurasandaray iquetda.

3 Et sicato linmugad saquey ed saramay baloto, á sicato may cayarian nen Simón, et quiniereotod sicato ya yaraoitoy daiset ed dalin ; et inmironġ, et inbabanġato, manlapud samay baloto, so daqueraquel á too.

4 Et nen tinmondan nansalita, incuantod Simon : Ontaeoca et ipuelagyoray, iquetyo ed amin á pansigay.

5 Et inmebat si Simón et incuantod sicato : Managbanġat, nacsaoancamin sanlabi et angapoy naalami ; inġuen lapud salitam ipuelagcoray iquet.

6 Et nen ontay guinaoato, acapanġipucoc ira na acaamaya-may á sira, et apilatpilat iray iquetda ;

7 et inandaoesan daray ibibarad sananey á baloto, pian ondagoran manolong ed sicara ; et dinmagora et pinanora so saramay duan baloto diad ontanlan onlereg ira la oari.

8 Et nen anengneng nia nen Simon Pedro, tinmalimocod ed arap nen Jesús, á nancuan : Onaraoidad siac, Cataoan, ta tooac á managcasalanan.

9 Lapud niquelaoan, sicato tan saramay amin ya oalan caopto, nisenġeg ed inpacalarad saray siran asigayanda ;

10 tan ontanda muet di Santiago tan Juan ya anac ira nen Zebedeo, á caolop ira nen Simón. Et si Jesús incuantod

Simon: Agca antacot; manlapud natan mansigaycad saray totoo.

11 Et nen niyacaddalad dalin so saramay baloto, tinainan-daran amin et tinmomboc irad sicato.

Incatambal na saquey ya acating.

12 Et agaoa á nen oalad saquey ed saray ciudad, nia, saquey á too á napnoy cating á nen anengnengtoy Jesús, indacmomo-toy lupato diad dalin, et nanquereo ed sicato á cuanto: Cataoan, no labaymo, nayarianmoac á linisan.

13 Et inyonat nen Jesús so limato, sicutoy dinioi'ton nancuan: Labayco; nalinisanca. Et tampol á samay cating na-andid sicato.

14 Et inbilintod sicato ya agto salitaen ed angan siopa: Inguen naca, cuantod sicato, ompatnagcad sacerdote et mangi-bagatcad incalinisanmo, onong na bilin nen Moises, pian oalay pacanengnenganda.

15 Balet oncayat lan oncayat so dengelto et nantitipoy da-quel á too ya ondenġel tan patambal ed saquisaquitda.

16 Inguen sicato inmaraoi á linmad calaoacan ya aquicascasi.

Incatambal na saquey ya ag macagalao.

17 Et agaoad saquey ed saraman ya agueo á sicato man-babanġat, et saramay Fariseo tan macacabat na gangan, á nanlapurad amin á puloc na Galilea, tan Judea tan Jerusalem, oalaran acayorong: et oalad sicutoy pacapaniari Cataoan á manambal.

18 Et nia, oalaray totoon anġiacad ed saquey á docolan na saquey á toon ag macagalao: et aanapenday pangilooban tan panginandad sicato diad arapto.

19 Et nen angapoy naromogdan pangiloobad sicato lapud caraquel na too, sinmeguep irad toctoc na abung et diad binu-taodan atep inepasdan pati docolanto diad puegleyda ed arap nen Jesús.

20 Et nen anengnengtoy pananisiara, incuanto : Too, saray casalananmo napaandirad sica.

21 Et saramay escriba tan Fariseo guinapoandan ninonot ya incuan : ¿ Siopa'ya á mansasalitay mabanday ? ¿ Siopay macayarin mamaandid saray casalanen no ag say Dios lambuengat ?

22 Balet si Jesús nen nacabatantoy canonotanda, inebatan-tora á cuanto : ¿ Antoy nonnonotenyod capuscoanyo ?

23 ¿ Dinay maininomay sopangiuca : Saray casalananmo napaandirad sica, ó say pangicuay : Onalagueyca et manacacda ?

24 Balet pian nacabatanyo á say Anac na too oalay pacapaniarito diad dalin á mamaandid saray casalanán, (cuantod samay ag macagalao) : Cuancod sica : Onalagueyca, et libit-moy docolanmo, et onlacad abungmo.

25 Et tampol inmalaguey diad arapda, et linibi'tomay doco-lanto, et linmad abungto ya igagalgalangtoy Dios.

26 Et nanquelao iran amin et ingalgalangday Dios ; et nap-noray tacot á cuanda : Acahengneng cami natay macapaquelao.

Incataoag nen Levi.

27 Et cayaridara'nia, pinmaoay ed acanengneng na saquey á somisingil na buis á manngaray Levi, ya acayorong ed panag-singilay buis, et incuantod sicato : tomboquenmoac.

28 Et nen tinainanton amin, inmalaguey et tinmomboc ed sicato.

29 Et ingaoaan nen Levi na saquey á baleg á doypo diad abungto ; et oala nen samay daquel á dinmagod saray somisi-ngil na buis tan arumnira ya aquirongod sicara diad panan-ganan.

30 Et saramay Fariseo tan saramay escriba nantalobotob iray sungpad saray binangatanto á cuanda : ¿ Aquit mican tan-miinumcayod saray somisingil na buis tan diad saray macasalanen ?

31 Et inmebat si Jesús et incuantod sicara : Saray oalan macsil agda caocolay mananambal, noag inguen saray oalan agmacayari.

32 Agac linmadian manaoag ed saray matonong, noag inguen saray managcasalanan pian magbabaoira.

Say panagayunal.

33 Et incuandad sicato: Saray binangatan nen Juan mabuetbuet iran manayunal tan micasasi, et ontan muet iray binangatandaray Fariseo; balet saray binangatanmo, mangtan oninom ira.

34 Et si Jesús incuantod sicara: Nayarianyo á panayunalen á saray anac na panbabansalan nosay laquin asaoa oalanin niolop ed sicara?

35 Balet onsabiray agueo á naecal ed sicaray asaoa; insan irala manayunal ed saratan ya agueo.

36 Et incuanto muet ed sicaray sananey ya alimbaoa: Angapoy too á mamilat na caoes á balo et isacabtod daan á caoes; ta no andi, pilaten naani balo, et diad daan ag muet manepueg so sacab ya inalad balo.

37 Et angapoy mangiay balon alac ed saray daan á birong; ta no andi, say balon alac pilatento naaniray birong, et say alac naibong et naderal iray catat:

38 Balet say balon alac nepuegtoy niyad saray balon birong.

39 Et angapoy toon acainum na ombac ya alac et calic-tanentoy balo; ta cuanto: Magmaong so ombac.

Si Jesús, Cataoay Sabado.

6 ET agaoa á diad inlabas to nen Jesús ed saray tinaneman, diad comaduan Sabado cayari inmuuna ed Pasco, saray binangatanto nanbagot iray daoa, et angacan ira á binodbod-darad calimaanda.

2 Et arum ed saray Fariseo incuanda: ¿Aquit gaoaenyo so ag niabuloy á gaoaed Sabado?

3 Et inmebat si Jesús et incuantod sicara: ¿Agyo ta ni abása so guinaoa nen David nen narasan, sicato tan saray oalad sicato;

4 á linmoob ed abung na Dios et inalatoray tinapay á niba-

gat diad altar, et angan tan initdantora muet so saray oalad sicato; *sicato ya* ag niabuloy á canen na angan siopa no ag saray sacerdotes lambuengat?

5 Et incuantod sicara: Sayay Anac na too sicatoy Cataoay Sabado.

Incatambal na saquey á toon amagaay saquey á limato.

6 Agaoa muet ed saquey á Sabado, á linmoob ed sinagoga, et manbabangāt; et oala nen samay saquey á too diman, et say limaton caoanan amagaan.

7 Et sicato sisiimen na saray escriba tan Fariseo no manambal diad Sabado, pian macaromog ira na pangidalemandad sicato.

8 Balet sicato amtatoray canonotanda, et incuantod samay too ya amagaay limato: Onalagueyca et onlacad puegley. Et sicato inmalaguey tan linmad puegley.

9 Et si Jesús incuantod sicara; Tepuetencod sicayo: ¿Nia-buloy diad Sabado so pangaoay maong ono say pangaoay maugues? ¿say pangilabad bilay ono say pangecal?

10 Et nen ninengnengtoran amid abayto, cuantod saman á too: unatmoy limam; et sicato ontay guinaoato, et say limato nipaol.

11 Balet napnoray gula et nansasalitaran saquey tan saquey no antoy nayarianda casin gaoaed Jesús.

Incapiliray labindua.

12 Et agaoad saraman ya agueo á linmad palandey á manpikasi, et nansanlabi ya aquicasid Dios.

13 Et nen cabuasanla, tinacagtoramay binangātanto et amili labinduaad sicara ya inngarantora muet na apostoles:

14 Salanti si Simón, ya inngaranto muet na Pedro, tan si Andrés ya aguito, tan si Santiago, tan si Juan, tan si Felipe, tan si Bartolomé,

15 tan si Mateo, tan si Tomás, tan si Santiago ya anac nen Alfeo, tan si Simon ya inngaray Sumisiim.

16 tan si Judas, agui nen Santiago, tan si Judas Iscariote á nagmalio á saquey á liputan.

17 Et linman aquiolop ed sicara, et tinmondad saquey á maralos á dalin, pati saquey á caraclandaray binangātanto, tan saquey ya ag nabilang á caraclan diad ombaley, á nanlapura ed amin á Judea tan Jerusalem, tan guilig na Tiro tan Sidon, á sicaray dinmagon ondengēl ed sicato tan pian natambal irad saquisaquitda ;

18 tan saray pinapairap na saray espiritun mabanday ; et atambal ira.

19 Et amin iray caraclanday totoo sineetandan dioiten, ta ompaoay ed sicato so talongaring, et pinaabigto ira ya amin.

Say panagppolongtod palandey.

20 Et sicato intagueytoy matatod saray binangātanto et incuanto : Mapaladcayon duruca, ta quienyoy panariay Dios.

21 Mapaladcayon narasan natan, ta napueselcayo. Mapaladcayon mannangnangis natan, ta onele'cayo.

22 Mapaladcayo sano busulendacayo na saray totoo, tan sano papaliisen dacayod sicara, et modmoraendacayo, et ipulisaydaray ngaranyo á singa maugues nisengeg ed sayay Anac na too.

23 Ongayagacayo no saman ya agueo et onlocsocayo ed liquet : ta nia, say tomangyo balbaleg ed panariay taoen ; ta ontay guinaoaray amarad saray profetas.

24 Balet, ¡ abagueyquila sicayon mamayaman ! ta inaoatyolay liglioayo.

25 ¡ Abagueyquila sicayon napsel natan ! ta naerasancayo-
¡ Abagueyquila sicayon maneelec natan ! ta maningel tan mannangis cayoy.

26 ¡ Abagueyquila, sano amindaray totoo mansalitaray maong ed sicayo ! Ta ontay gagaoen na saray amarad saray alioan tuan profeta.

27 Balet cuancod sicayon mandengdengēl : Aroenyoray cabusolyo : mangaoa cayoy maong ed saray mamosol ed sicayo ;

28 mansalita cayoy maong ed saray mangisambad sicayo, et picasiyoray mandamsac ed sicayo.

29 Say manugat ed sicaḁ aping á saquey, ipatnagmo muet so bieḁ ; et say mangecal ed sicay colibuenbuenmo, agmo paandied sicato muet so angan aysingmo.

30 Et itdanmoray amin á manguereo ed sica ; et say mang-alay cayarianmo, agmo paóilen á quereoen.

31 Et no panoy labaymo á gaoaen comod sicayo na saray totoo, ontan muet ed sicaray gaoaenyo.

32 Ta no aroenyoray mangarod sicayo ; ¿ antoy gongona á naalayo ? : ta angan saray macasalanan aroendaray mangarod sicara.

33 Et no mangaoa cayoy maong ed saray mangaoay maong ed sicayo, ¿ antoy gongona á nagamoranyo ? Ta angan saray macasalanan ontan muet so gaoaenda.

34 Et no pabayesenyora ilaloanyon pangaoatan, ¿ antoy gongona ya alagdenyo ? ta saray macasalanan mamabayes ira muet ed saray macasalanan, pian ontan muet so aoatenda.

35 Balet aroenyoray cabusolyo ; et mangaoacayoy maong, et mamabayescayo ya andi alagdenyon balot et baleg so nagongonayo, et anacto cayod satay Sancataguian, ta sicato mapangasid saray malamang tan maugues.

36 Mapangasi cayo sirin, onong á mapangasi Amayo.

37 Et agcayo mangocom, pian agdaqui muet ocomen : et agcayo manusa, et agqui muet nadusa : mamaandi cayo, et napaandianqui muet ;

38 mangited cayo et naitdan cayo ; sucát á maong, malet, asecsec tan manleplepuas so iteddad acoalanyo ; ta diad sucát á panucatyó, sicato muet so panucatandad sicayo.

39 Et inoli'to muet ed sicaray saquey ya alimbaoa : ¿ Nayaran casi bulag so mangidaóat na bulag ? ¿ Ag ira casi napuelag á dua ed abut ?

40 Say binangatan alioan lalo nen say managbangá'to, balet balang saquey ya ayadyari niparad managbangá'to.

41 Et ¿ aquit nengnengenmoy taep ya oalad matay aguim, et agmo nengnengey pagsen ya oalad matam muet lanlamang ?

42 ¿ Ono panoy pacayarim á mangibagad aguim : Agui, paolíanmoac á mangecal na taep ed matam, et agmo nanengneng so pagsen ya oalad dilin matam ? Pacalala, ecalmo nin

ononad matam, so pagsen, et diad satan macanengnengcan maong a mangecal na taep ya oalad matay aguim.

43 Ta angapoy maong á quieo á manbungay maugues, et angapo muet so maugues á quieo á manbungay maong.

44 Ta balang quieo nabidbir ed bungato muet lanlamang, ta ag macaalaray totoo na higos diad espino, et ag ira muet macabodbor na uvas diad zarza.

45 Say maong á too ipaoayton maabig diad maong á cayamanay pusoto; et say toon maugues ipaoaytoy caugsan diad maugues á cayamanay pusoto: ta diad daacan á puso salitaey sangito.

46 ¿ Et aquit taoaguendaac na Cataoan, Cataoan et ag yo gaoaey ibagac?

47 Amin so ondagod siac et denglentaray salitac et gaoaentora, ipanengnengcod sicayo no dinay caparato:

48 Singa saquey á toon mamaalaguey na saquey ya abung, ya angotcot et pinaaralemto, et inyantoy cimientto ed tapueo na bato: et nen sinmabi delap, say ilog tinopatoy macmacsil imay abung, et ag to apagalao; ta oalan nipaalaguey ed tapueo na bato.

49 Inguen say ondengel et agto gaoaen, nialimbaoad toon amaalaguey na abung ed dalin, ya andi cimientto, et tinopan macmacsil na ilog, et tampol abagbag; et baleg so incaderaltonman ya abung.

Say centurion ono pangoloray totoon manayura diad Capernaum.

7 CAYARIN inbaga nen Jesús so amin á sinalitad calaya-gandaray ombaley linmoob ed Capernaum.

2 Et say aripuey saquey á Centurion, ya inadarotoniay baleg, asaquitán ed ngalangali ompatey.

3 Et nen nadngeltoy nipaacad ed Jesús, inbaquitod sicato so saray mamasiquendaray Judio, pian picasianda ya onla comon et ilabantoy aripuento.

4 Et sicara, nen linmarad Jesús, sicutoy aquicasianda á cuanda: ¡ Manepueg á gaoaenmo'ya nisengeng ed sicato;

5 ta inarotoy nación tayo, et sicato impaalaguianto itayoy sinagoga!

6 Et si Jesús tinmomboc ed sicara. Inguen nen sicutoy alioalan araoid abung, samay Centurion angibaquid sicato na cacaaroto á nanacad sicato: ¡Cataoan, agca mansagpot, ta agac onnepueg ya onloobca ed silong na oloy abungco:

7 canian agco muet inpasen á manepuegac ya on dagod sica; balet ibagam so saquey á salita et say aripuenco onabig!

8 Ta siac tooac muet á niyan ed luepsag na macaoley et oala muet ed pacaoley co ed saray sondalo, et cuancod saya; Naca et onla; et diad saquey; Gala et ondago; et diad aripuenco: Gaoam'ya et gaoaento.

9 Et nen narenḡel nen Jesús iraya, nanquelaoanto; et nen inmarap ed saray totoon mantomboc ed sicato, incuanto: Cuancod sicayo, ya angan diad saray Israelitas agac ni acaromog na onian cabaleg na pananisia.

10 Et saramay nibaqui nen pinmaoil irad abung, asabian-dalan inmabig imay aripuen.

Say anac na abalon bi diad Nain.

11 Et agaoa diad cayadyari darania, á sicato linmad saquey á ciudad á manḡaray Nain, et aquiolop ed sicato so saray binangatanto tan saquey á caraclay too.

12 Et natan, nen acaasingued ed pintoy ciudad, nian ipapaoyday saquey ya inatey, á bugbugtong ya anac nen inato, á sicutoy abalo; et daquel iray totood ciudad á tinmomboc ed sicato.

13 Et nen anengneng na Cataoan quinasianto, et cuantod sicato: ¡Agca mannangis!

14 Et inmasingued et dinioi'tomay lunḡon; et saramay nanaoit nia, timnondara. Et cuanto: ¡Balolaquí, cuancod sica: Bangonca!

15 Et samay inatey binmanḡon et guinmapon nansalita. Et inyaoa'tod quienen inato.

16 Et say tacot sinmabid sicaran amin et ingalgalangday

Dios á cuanda : Say saquey á baleg á profeta inmalaguey diad sicutayo, et say Dios dinalaotoray totooto.

17 Et quinmayat'yan dengelto diad amin á Judea, tan diad amin muet á dalin á calibuedlibuedto.

Saray inbaqui nen Juan Bautista.

18 Et saramay binangatan nen Juan inpacabatdad sicato so amindarian buengatla.

19 Et nen tinaoag nen Juan so saray duarad binangatanto, inbaquitorad Cataoan, pian cuanda : ¿Sicamay onsabi ono alagdenmi sananey ?

20 Et nen linmaramay totoo diad sicato, cuanda : Si Juan á Bautista inbaquito camid sica, pian icuanmi : ¿Sica'may onsabi ono alagdenmi sananey ?

21 Diad saman ya horas tinambaltoray daquel diad saray saquisauit tan bacbac, tan espiriton mabanday : et initdantoray pacanengneng so saray bulag.

22 Et inmebat si Jesús et incuantod sicara : Lacayo, et ibagayod quienen Juan so anengneng tan nadngelyo : á saray bulag acanengneg ira, saray piley acaacad ira, saray acating alinisam ira, et saray telec acadngel ira, saray inatey oalaray inmolid bilay, et diad saray duca oalan nipolong ed sicaray Maong á Balita.

23 Et mapalad so siopaman ya ag macaromog ed siac na cagapolan.

24 Et nen tinmainan la'ramay inbaqui nen Juan, guinmapon hancuan ed saray daquel á too na nipaacad ed quienen Juan : ¿Antoy pinaoayanyo á ninengneng dimal laoac ? ¿Saquey á caoayan á sinipsiplog na daguem ?

25 Balet, ¿antoy pinaoayanyon ninengneng ? ¿Saquey á toon nancoes na mabli ? Nia, saray mancaoes na mabli, tan manbilay irad liqueliquet, diad saray palacioray arari caoala-
anda.

26 Balet, ¿antoy pinaoayanyon ninengneng ? ¿Saquey á profeta ? On, cuancod sicayo, et lalo ni nen saquey á profeta.

27 Sayay nisulatan na samay :

Nia, siac ibaquic so ibaquic diad arap mo,
Sicato á mangitadiay dalanmo diad arap mo.

28 Ta cuancod sicayo á diad saray nianac ed saray bibii,
angapoy balbaleg nen si Juan ; balet say camelagad panariay
Dios balbaleg nen sicato.

29 Et amindaray ombaley ya acadngel ed sicato, tan saray
somisingil na buis, pinatuaray Dios ya inpabiniagan irad
panaminiag nen Juan.

30 Balet saramay Fariseo tan macabat na gangan agda
dinengel so bilin na Dios diad caderalanda muet lanlamang,
ya ag ira inpabiniagad sicato.

31 Et cuay Cataoan : ¿ Siopa, sirin, so pangiparaancod saray
totood sayan cailalacan et antoy caolibayda ?

32 Caolibay daray ugugao á manyorong ed plaza, á manii-
ngalay saquey tan saquey ed sicara, á cuanda : Sicami tinogto-
ganda cayoy flauta, et agcayo sinmayao ; incantaanda cayoy
dagueyem, et agcayo nannangis.

33 Ta linmadiay Juan Bautista ya ag mangay tinapay, et
ag muet oninom na alac, et cuanyo : Oalay demonioto.

34 Linmadiay Anac na too, á mangān tan oninom, et
cuanyo : ¡ Niay saquey á too á masiba tan mainom na alac,
caarodaray somisingil na buis tan saray macasalanan !

35 Balet say cacabatan patuaen ya amin iray anacto.

*Say biin macasalanan ya amoyoc ed saray sali
nen Jesús.*

36 Et quinereo ed sicutoy saquey á Fariseo á mangān comon
diad sicato. Et linmoob ed abung na samay Fariseo et
dinmongod dulang.

37 Et nia, saquey á biin macasalanan ya oalad ciudad nen
acabatanto á si Jesús oalan dinmongod dulang ed abungton'-
may Fariseo, angiacad na saquey á vason alabastro á napnoy
ungüento,

38 et nen inmalaguey ed beneg diad abay na saray sali nen
Jesús guinmapon mannangnangis a sinalog ed saray luato so

saray sali nen Jesús, et pinunasantorad saray buec na oloto : et inangobantoray salito et pinuyocantora na ungüento.

39 Inguen nen nanengneng nia na samay Fariseo ya anaoag ed sicato, nansalidad dalemto á cuanto : Saya, no profeta comon, amtato no siopa tan no anton nengneng na bii so saya á manidioit ed sicato, ta sicato macasalanan.

40 Et si Jesús inmebat et cuantod sicato : Simón, oalay daiset ya ibagac ed sica. Et sicato cuanto : Ibagam, Managbangat.

41 Saquey ya amautang oalay duaran acautang ed sicato ; say saquey acautang ed sicato ; liman lasus á denario, et say saquey limampolo.

42 Et lapud angapoy napanbayarda, pinaandiantoran dua na utang. ¿Siopañ saraya, sirin, so nagcalaloy pangarotod sicato ?

43 Et inmebat si Simón, á nancuan : Cuanco á samay amandiantoy nagcalalo. Et sicato incuantod sicato : Matunong so pangipasenmo.

44 Et nen inmarap ed samay bii, incuantod Simón : ¿Nanengnengmo'yay bii ? Linmoobac ed abungmo, agca angited na danum nipaacad ed saray salic ; balet saya, sinalogtoray salic ed saray luato et pinunasantorad buecto.

45 Agmoac inangoban ; balet saya, nanlapud inloobto ag tinmonda ya inmangob ed saray salic.

46 Agmo pinuyocan so oloc na larac ; balet saya pinuyocanto na ungüento so saray salic.

47 Canian cuancod sica, saray casalananton daquel napaandira, ta angaroy daquel ; balet say napaandiy daiset, daiset so panangaroto.

48 Et incuantod sicato : Saray casalananmo napaandira.

49 Et saray oalan nidongod sicator panangan guinapoandan cuan ed loobda : ¿Siopa'ya, á mamaandi muet ed saray casalanan ?

50 Et incuantod samay bii : Say pananisiam inlabantoca ; nacala ed careenan.

Saray bibiin inpanserviray cayarianda ed quienen Jesús.

8 ET agaoa diad ag abayag, á sicato manacad ed saray amin á ciudad tan puloc á manpopolong tan ipacaba'toy evangelio napanariay Dios ; et saramay labindua ibatora,

² tan saray arum á bibii ya atambal irad saray espíritun mabanday, *salanti* : si María ya inngaray Magdalena, á pinaoayay pitoran demonio,

³ tan si Juana, asaoa nen Chuza, á managpagad abung nen Herodes, tan si Susana tan daquel niran aruarum á nanservid sicato diad saray cayamananda.

Alimbaoa ed managtanem.

⁴ Et nen mantitipoy baleg á caraclan et saray oalad balang ciudad linmarad sicato, nansalita ya inagamiltoy alimbaoa :

⁵ Say managtanem pinmaoay á linman angitanem na ilito ; et nen nantanem, say arum naplag ed guilig na dalan et agatingatinan, et saray manoc ed taguey sicatoy quinanda.

⁶ Et say arum naplag ed tapueo na bato, et catoboto, amagaan lapud angapoy buetelto.

⁷ Et say arum naplag ed casabitan, et nen tinmobo muet á nidingan so saray sabit, sicatoy pinatey iranía.

⁸ Et say arum naplag ed mabonan dalin, et nen tinmobo, angited na bunga á tunggal lasus. Nen asalitato la'raya, inyaquisto : Say oalay layag á pandengël, ondengël comon.

⁹ Et saramay binangatanto tinepuet dad sicato no anto'ya casin alimbaoa.

¹⁰ Et incuanto : Diad sicayo niabuloy so pacapicabat ed saray misterioy panariay Dios ; balet diad saray arum pulos ya alimbaoa, pian angan nengnengnengenda agda nanengneng, et angan dengdenglenda agda natalosan.

¹¹ Saya lanti alimbaoa : Say ilic sicatoy salitay Dios.

¹² Et saray *naplag* diad guilig na dalan, sicaray dinmengël ; diad cayarito onsabi Diablo, et ecalentoy salitad capusoanda, pian agda sisiaen et ag ira nilaban.

¹³ Et saray *naplag* diad tapueo na bato, sicaray dinmengël et

sacoenday salita á maliqueliquet; et saraya angapoy lamutda, et manisiarad pigaran panaon, en diad agueo na catocso onsian ira.

14 Et saray naplag ed casabitan, sicarayay dinmengel, et nen onlarad dalanda, nalened irad agum tan cayaman tan liqueliquet ed sayan bilay et ag ira manbongay naloto.

15 Et saray *naplag* diad mabonan dalin, sicarayay totoo á diad maong tan matunong á puso dinengelday salita et buenbuenanda et manbongaran maanus.

Alimbaoa ed siniguit.

16 Et angapoy too á sano aselselantoy saquey á sileo sacobanto ed banga, ono iyantod silong na saquey á docolan; no agto inguen iyan ed saquey á candelero, pian saray onloob nanengnengday sileo.

17 Ta angapoy maamot ya ag nipatnag, tan buengatlan inyamot ya ag nacabatan ono ag nipaoay ed liaoa.

18 Nengnenyo, sirin, onong na narengelyo; ta siopaman ya oalaan, naitdan; et siopaman ya andian, angan say isisipuento nin cayariato, naecal ed sicato.

Saray agagui tan say ina nen Jesús.

19 Et linmad sicato si inato tan saray agaguito; et agda ayariay inmasingued ed sicato lapud caraclay too.

20 Et nipacabat ed sicato; Si inam tan saray agaguim oalarad paoay á labaydacan nengnengen.

21 Et sicato inmebat et incuantod sicara: Say inac tan saray agagnic sicaray ondengeñ na salitay Dios et sicatoy sungpalenda.

Si Jesús pareenentoy baguio.

22 Et agaoad saquey ed saraman ya agueo, á sicato linmugan ed saquey á baloto tan saray binangatanto. Et cuantod sicara: Onla itayo ed bieç á saquey na libsong. Et linmara.

23 Et nen mansasacay ira sicutoy nauguip. Et sinmabi saquey á baguiyoy daguem ed samay libsong et magcatalereg tan maatatap ira.

24 Et sinminggued ira⁷ sicato, et liniingdan cuanda : Ma-nagbangat, Managbangat, ompatey tayo la ! Et nen aliing, nanpasnocantoy daguem tan samay subueg na danum et dinmeen ira, et sinmabi linac.

25 Et cuantod sicara : ¿ Ined so caoalaay pananisiayo ? Et sicara á sitatacot, nanquelao ira á cuay saquey tan saquey ey sicara : ¿ Siopa'ya, sirin, á mangangan angan diad sarad daguem tan danum, et sicutoy onorenda ?

Say Gadarenon aselepay demonio.

26 Et sinmabirad dalindaray taga Gadara ya oalad arap na Galilea.

27 Et nen inmeapas si Jesús ed dalin, inmabet ed sicutoy saquey á toon nanlapud ciudad ya aselepay demonio ; et diad leleg na andoquey ya agueo angapoy insolongton caoes tan ag nanayam ed dinanman ya abung no ag diad saray loboc.

28 Et nen nanengnengtoy Jesús, nanaquis et tinmalimocod diad arapto, et incuantod macsil á voces. ¿ Antoy pibiangancod sica, Jesús, Anac na Dios á mabilay ? queroencod sica ya ag moac pairapuen.

29 (Ta iganganto nen saman ed espíritun mabanday ya ompaoay ed samay too ; ta sicutoy abayaglan quinayarianto : et angan seseetandan pueguetan á siniguedday golonggolong tan grillos, sicato balet, deralentoray singed ya inaoit na demonio ed calaoacan.)

30 Et si Jesús tinepue'tod sicato : ¿ Antoy ngaranmo ? Et incuanto : Legion ; ta daquel á demoniyo linmoob ed sicato.

31 Et quequeroendad sicato ya agtora comon igangan ed caaralman.

32 Et oa'dmay saquey á paloc na daquel ó babuy á manca-cabab ed palandey : et quinereodad sicato á paoliantora comon ya onloob ed sicara : et inabuloytod sicara.

33 Et nen pinmaoay laramay demonio ed samay too, lin-

moob irad saramay babuy ; et samay puloc tinmaboy ed saquey á quehas na libsong et nalded ira.

34 Et nen anengneng na saramay manbabantay so agaoa, binmatic ira.

35 Et pinmaoay iran onnengneng na agaoa et linmarad Jesús, et aromogdan manyodyorong imay toon pinaoayandaranmay demonio, á sicacoes tan macalcalacal, ed salian nen Jesús ; et tinmacot ira.

36 Et inulit ed sicara na saramay acanengneng, no panoy inabigtonmay aselepay demonio.

37 Et amindaray ombaley diad dalindaray taga Gadara á manlibedlibed quinereodad sicato á tainantora comon : ta linmoob ed sicaray baleg á tacot. Et sicato sinmapat ed samay baloto tan pinmaoil.

38 Et samay toon pinaoayandaranmay demonio, aquicasid sicato pian miolop comod sicato ; balet si Jesús pinapaoilto ya incuanto :

39 Paoilcad abungmo et ulitenmo no panon cabaleg so saray bengatlan guinaoa'd sicay Dios. Et sicato linma ya inbelbeliao to'd amin á ciudad so saray ancabaleg á buengatlan guinaoa nen Jesús ed sicato.

Say mariquit nen Jairo ; say biin mabolos na dala.

40 Et nen pinmaoil si Jesús, inacon maliqueliquet na saramay daquel á too, ta sicatoy aalagdendan amin.

41 Et nia, linmay saquey á laquin manngaray Jairo, et sicato pangolod sinagoga, et dinmacmomod saray sali nen Jesús, et quinereoted sication onloob ed abungto ;

42 ta oalay saquey ya ap-apigued ya anacton bii, á mantaoy labindua, et ngalngali ompatey. Et nen manaacad *ya onlay* Jesús nanbobonton iray totood sicato.

43 Et saquey á biin nanairapan ed panbolos na dala ed labinduay taon, ya inopo'tod saray mananambal so amin a cayamananto, et anggapoy acapaabig ed sicato.

44 inmasinggued ed beneg nen Jesús, et dinioi'toy saloy na caesto ; et tampol á tinmonday panbolos na dala.

45 Et incuan nen Jesús : ¿ Siopay anioit ed siac ? Et nen paandiendan amin, cuan nen Pedro tan saray ibibato : Managbangat say daquel á too onsesecsec ed sica bobontonandaca.

46 Balet incuan nen Jesús : Oalay anioit ed siac, alicasco ya oalay pinmaoay ed siac á pacapaniari.

47 Et nen nanengneng na samay bii ya ag macaamot, linman manguiguio, et nen tinmalimocod ed arapto, inbagatod sicato, diad arap na amin ya ombaley, so sengeg na anioitanto'd sicato tan say biglan inabigto.

48 Et sicato incuanto : Ana'co, say pananisiam pinacasil-toca ; naca lad careenan.

49 Et nen mansasalita nin lamang, sinmabi saquey á nanlapud abung na pangolod sinagoga, á cuanto : Say biin anacmo inatey la, agmo panquesaoey Managbangat.

50 Ingen nen narengelan nen Jesús, inmebat ed sicato : Agca antacot ; manisiac lambengat, et sicato onabig.

51 Et nen linmoob ed abung, anggapoy pinaloobto á tinmomboc ed sicato no ag si Pedro lambengat tan si Santiago tan si Juan tan say ama tan ina na samay mariquit.

52 Et mannangis iran amin tan sicaloy panagogolanda. Balet sicato cuanto : Agcayo onnangis ; ta ag inatey no ag ingen nauguip.

53 Et sicaloy inelecandan binalao, ta amtara lan inatey.

54 Balet sicato, nen inegnaantod lima, tinaoagton nancuan : Mariquit, ombangonca.

55 Et say camareruato pinmaoil, et tampol á binmangon : et inganganto ya itdanday canento.

56 Et saramay atatengto niquelaoan ira ; balet sicato inbilin tod sicara ya anggapoy panongtongandad agaoa.

Betangday labinduan apóstol.

9 ET sanen tinipon nen Jesús iray labinduan binangatanto, initdantoray pacayari tan pacaoley ed ganaganay demonio tan pananambal ed saray saquit.

2 Et imbaquitara á mangipolong na panariay Dios tan manambal ed saray asaquit.

3 Et cuantod sicara: Agcayo mangalay anggan anton balon ed dalan, anggan tayucod, anggan supot, anggan tinapay, anggan pilac; et agcayo mangitaroc na duaran caoes.

4 Et diad bengatlan abung á loobanyo, ontila'cayodman et dimay panlapuanyo.

5 Et aminday ag mangaoat ed sicayo, sano ompaoaycayod saman á ciudad, pocpocanyoy daboc ed saray saliyo á pangipangneng na sungpad sicara.

6 Et linmara, inacaddan ami binaleybaley ya inpolongday evangelio, et nantatambal irad amin á pasen.

Si Herodes á tetrarca tan si Juan Manaminiag.

7 Et si Herodes á tetrarca acabatantoy amin á nagagaoa; et manduarua, ta cuandaray arum á si Juan inmolid bilay ed saray inaatey;

8 et saray arum cuanda á si Elias pinmanengneng, et saray sananey cuanda á saquey ed saray profetan daan so inmolid bilay.

9 Et cuan nen Herodes: Si Juan inpapotolanco, ¿balet siopayan pacadngelancoy sarayan bengatlan nipaacad ed sicato? Et labayton nengnengen á pilit.

Immunan nanparaquelay tinapay.

10 Et sanen pinmaoil iray apóstol, inulitdad sicato so amin á guinaoara. Et inalatora, et tinmainan iran nanbochocod ed saquey á ciudad á manngaray Betsaida.

11 Et nen nacabatan'ya na saray daquel á too, tinmomboc irad sicato; et inaoattora tan aquisalitaantorad nipaacad ed panariay Dios, et tinambaltoray nancaocolay pananambal.

12 Et say agueo ongagapolan onngarem: et sinminggued iray labindua et incuandad sicato: Pasipotmo laray daquel á too, pian onlarad baley tan caabungad calibedlibed, ya ondaoes tan mananap na canenda; ta dia oala itayod pasen ya anggapoy too.

13 Balet cuantod sicara: Itdanyoray canen. Et incuanda:

Anggapod sicami no ag say limlimaran tinapay tan duaran sira, no ag ingén onlacamin manalio na canen ya oncanad sarayan amin á too.

14 Et liman liboy toon oadman. Et incuantod saramay binangātanto: Payurongyora á pancocompoguey sanlilimampolo.

15 Et ontay guinaoara et pinayorongdaran amin.

16 Et inalatoramay limaran tinapay tan saramay duaran sira, et sanen tinmangay ed taoen binendicionantora; et pini-sagto tan initedtod saramay binangātanto pian yandad arap na amindaranmay totoon daquel.

17 Et angān iran amin, et napsel ira; et say nacdaan ed saray pisapisag, acalaray labinduan babaco.

Say inpanģicompisal nen Pedro na pananisiato.

18 Et agaoa á sanen manpipicasin bocodto, oadman iray binangātanto, et tinepetod sicaran incuanto: ¿Siopaac ed cuandaray too.

19 Et inmebat ira tan cuanda: si Juan Manaminiag; et saray arum cuanda, si Elias; et saray sananey cuandan inmolid bilay so saquey á profetan daan.

20 Et incuantod sicara: ¿Balet sicayo siopaac ed cuanyo? Et inmebat si Pedro et incuanto: Sica si Cristo na Dios.

21 Balet sicato imbilintod sicara tan inganganto ya agda'ya salitaed siopaman;

22 á cuanto: Caocolan á sayay Anac na too manacoy daquel á bengātla, tan ag amtaen na saray mamasiquen tan macaoley na saray sacerdotes tan saray escriba, et ompatey tan onolid bilay ed comatlon agueo.

Pananacbat na cruz.

23 Et cuantod sicaran amin: Siopaman á toon maliquet ya ontomboc ed siac, paandientoy sication dili, et sacbatentoy cruzton inagueoagueo et tomboquentoac.

24 Ta siopaman á maliquet á mangilabad bilayto, naba-

langto; ingén siopaman á macabalang na bilayto nisengēg ed siac, nilaban.

25 Ta ¿antoy nabang na too no naalatoy sancamundoan, balet nabalangto tan naderaltoy lamanto?

26 Ta anggan siopan mangibaing ed siac tan saray salitac, sicutoy ibaing met na sayay Anac na too, sano ompaoil á magloria tan say gloria na Ama tan saray sasanto ya angel.

27 Balet cuancod sicayo ed matua: Oalay pigaran oadia ya agda nataoayay ipapatey anggad agda nanengneng so panariay Dios.

Say incaomay nengnengto.

28 Et agawa nen comaoalon agueo cayaridaranian salita, ya intaroctoy Pedro tan si Juan tan si Santiago, et sinmeguep ed palandey ya auicasi.

29 Et nen peles á micacascasi, say nengneng na samay lupato naoman et say caoesto nagmalio ya ampoti tan masnag.

30 Et nia, oalay duaran laquin misasalitad sicato, á sicara di Moisés tan Elias;

31 á pinmatnag iran sigogloria, tan sinasalitaray ipaoayto á ngalngali nasungpal dimad Jerusalem.

32 Balet si Pedro tan saramay ibato, macacaoguiip iran maong et sanen naliing ira, anengnengday gloriato tan saramay duaran laqui ya oalarad sicato.

33 Et agaoa, á sanen ontainan irad sicato, si Pedro incuantod Jesús: Managbangat, maong ed sicutayoy panayam dia, et manggaoa itayoy taloran ayaman: saquey so nabebetanganmo, et saquey so quienen Moises, et saquey ed quienen Elias, ya agto amtay sasalitaento.

34 Et nen peleston sasalitaen iraya, sinmabi saquey á lurem ya anirom ed sicara; et atacot ira nen asacopirad lurem.

35 Et pinmaoay so saquey á voces diad lurem á cuanto: Saya, sicutoy Anaco, sicutoy pinilic: sicutoy denglenyo.

36 Et nen imanlay voces, aromog á bocbocod nen Jesús; et ag ira nansalita; et diad saraman ya agueo anggapoy sinalitarad siopaman nipaacad ed anengnengda.

Incatambal na tobombalon bubulanen.

37 Et agaoa ed ontomboc ya agueo, á sanen inmeapas irad palandey, daquel á catooan so inmabet ed sicato.

38 Et niay saquey á tood samay olop á nanaquis á nancuan : Managbangat, quereocod sica ya ilingaomo comon so saray matam ed ana'co, ta bugbugtong ya ana'co ;

39 et nia, saquey ya espiritu sicutoy alaento et tampol ya onaquis ; et itulintulinto anggad napaboray sangito et mairap ya ompaoay ed sicato et cascasin ipaonongto.

40 Et quinereocod saray binangatanmo á papaoayenda comon, et agda ayarian.

41 Et innebat si Jesús et incuanto : ¡ Oh ! ilalac ya anggapoy pananisiato tan maugues, ¿ anggad capigan so panayamcod sicayo tan pangitepelcod sicayo ? Yacadmo dia so satay anacmo.

42 Et nen asinggued la, sicutoy ingueba na samay demonio ; balet nanpasnocan nen Jesús so samay espiritun mabanday, et tinambaltomay tobombalo, et impaoiltod quienen amato.

43 Et niquelaoan iran amin ed baleg á pacapaniari Dios.

Et nen manquelquelao iran amin ed sayan guinaoato, incuantod saray binangatanto :

44 Yanyod calayaganyorayan salita ; ta sayay Anac na too niaoat naanid calimaandaray totoo.

45 Balet agda atalosan nen saman so sayan salita, et niamot ed sicara pian agda natalosan, et antacot ira met á mangitepet ed sicato na sayan salita.

Say cataguian diad panariay taoen.

46 Et agaoay sangsangan ed sicara no siopa casi naanid sicaray cataguian.

47 Balet si Jesús, nen anengnengtoy pannunnunot na capusoanda, angalay saquey ya ugao, et iniantod abayto,

48 et cuantod sicara : Anggan siopan mangaoat na sayan ugao diad ngaranco, aotentoc ; et anggan siopan mangaoat

ed siac, aotentoy angibaquid siac; ta say camelagad sicayon amin, sicutoy cataguian.

Say alioan sungpad sicutayo oalad sicutayo.

49 Et innebat si Juan et cuanto: Managbangat, acaneng-nengcami saquey á mamapapaoay ed saray demonio diad ngaranmo et insebelmid sicato ta ag ontomboc ed sicami.

50 Ingen si Jesús incuantod sicato: Agyo isebel, ta say alioan sungpad sicutayo, oalad sicutayo.

Saray Samaritanos agda aaten si Jesús.

51 Et agaoa á sanen sinmabi laray agueo á quipaoiltod taoen pinaliguentoy lupaton onlad Jerusalem:

52 Et nanbaqui igagangan diad arapto, et linmara, et linmoob ira ed saquey á ciudad na saray Samaritanos, pian itadiaanday daoesan.

53 Et sicutoy agda inaoat lapud say lupato oala nen saman á singa onlad Jerusalem.

54 Et nen anengneg nia na saray binangatanton si Santiago tan Juan, incuanda: Cataoan, ¿labaymo ya iganganmi ya onepas so apuy ed taoen, pian upotentora, (onong met na guinaoa nen Elias)?

55 Balet sicato inmarap et nanpasnocantora (á cuanto: agyo amta no antocayon nengneng na espiritu).

56 (Ta sayay Anac na too ag linmadian manderal na saray bilay na totoo, no ag ingen pian ilabantora). Et linmarad sananey á baley.

Panoy itotomboc ed quienen Jesús.

57 Et nen manaacad irad dalan, incuay saquey á too ed sicato: Tomboquentaca naani anggan ined so laenmo.

58 Et incuad sicato nen Jesús: Saray zorras oalay ongibda, et saray manoc ed taguey oalay obongda; balet sayay Anac na too anggapoy napangisaralantod oloto.

59 Et incuantod sananey: Tomboquenmoac. Inġen cuanto: Cataoan, paolianmoac nin onla tan mangiponpon ed quienen amac.

60 Balet si Jesús incuantod sicato: Paolianmoray inatey á mangiponpod saray inateyda; balet sica onlaca et ipacabatmoy panariay Dios.

61 Et incuan met na sananey: Tomboquentaca naani, Cataoan; inġen paolianmoac, ta onlaac nin ompatanid ed saray oalad abungco.

62 Balet si Jesús cuantod sicato: Anggapoy too á sanen inyantoy limatod araro et onlingay nid beneg, et macanad panariay Dios.

Betangday pitompolon binanġatan.

10 ET cayari na sarayan agaoa, anġibiig so Cataoan na sananey á pitompolo, et inbaquitoran sanderua diad arapto, ed amin á ciudad tan pasen ya asinggued á laento.

2 Et cuantod sicara: Say anien tuan peteg á daquel; inġen saray manani daiset ira: canian, quereoenyod Cataoay anien ta manbaqui mananid aniento.

3 Manacadcayo, nia, ibaquitacayo á singan saray carnero diad pegley na saray lobo.

4 Agcayo mangitaroc na bolsa, anggan supot, anggan zapatos; et anggapo met so ibanoyod dalan.

5 Et diad anggan anton abung á loobanyo cuanyon onona: Say deen manayam eg sayan abung.

6 Et no oadmay saquey ya anac na careenan, say deenyo manayam ed sicato, inġen no andi, ompaoil la muet ed sicayo.

7 Et tondacayod saman ya abung á mangan tan oninom cayod iterdad sicayo; ta say comiquimey manepeg ed opato. Agcayo onalis ed sananey iran abung.

8 Et anggan diad anton ciudad á loobanyo tan pangacoandad sicayo, canenyoy isaclangda ed arapyo:

9 et tambalenyoray agmacayarin oadman et cuanyod sicara: Inmasinggued ed sicayoy panariay Dios.

10 Balet diad anton ciudad á loobanyo tan agda pangaoatad sicayo, ompaoay cayod saray dalanto et cuanyo:

11 Anggan say daboc na ciudadyo á pinmequet ed saray salimi, pocpocanmi á sungpad sicayo: anggaman ontan, amtaenyo, á say panariay taoen inmasingguer ed sicayo.

12 Cuancod sicayo á diad satan ya agueo anlemleleo so nipaacad ed Sodoma nen satan á ciudad.

13 ¡ Abagueycala!, Corazin, ¡ Abagueycala!, Betsaida, ta no diad Tiro tan Sidon agaoa comon so saray macapaquelao ya agaoad sicayo, abayag la comon á nanyurong irad daboc tan casabitan á nanpatalira.

14 Ingen anlemleleo naanid Tiro tan Sidon so caocom nen sicayo

15 ¿ Et sica, Capernaum, nitandoroca casi ya anggad taoen? ¡ nipaabebaca naani ya anggad Hades!

16 Say ondengel ed sicayo, denglentoac; et say mamatainan ed sicayo, patainanentoac; et say mamatainan ed siac, patainanentoay angibaquid siac.

17 Et pinmaoil so saramay pitompolo á sililiquet á cuanda: Cataoan, anggan saray demonio napatolocmira lapud ngaranmo.

18 Et incuantod sicara: anengnengco si Satanás á naplag nanlapud taoen á singa lasi.

19 Nia, initdantacayoy pacayari ya ongatin ed saray uleg tan alacdan tan diad amin á casil na cabusol; et anggapo naani macapaugues ed sicayo.

20 Balet agcayo manliquet nisengeg ed saya á saray demonio ontoloc irad sicayo; manliquet cayo ingen ta saray ngaranyo nisulat irad taoen.

21 Diad saman met lanlamang ya horas, si Jesús linmiquet ed Espiritu santo et incuanto: Misalamatac ed sica, Ama, Cataoay taoen tan dalin, ta inyamotmo rayan bengatla ed saray macabat tan macarandan et sicaray inpasingaoeymo ed saray ugugao; on, Ama, ta ontay macapaliquet ed saray matam.

22 Amindaray bengatla inyoat irad siac nen Amac; et anggapoy micabat no siopayay Anac no ag say Ama tan

siopa'yay Ama, no ag sayay Anac tan say labay á pangipasi-
ngaoeyay Anac.

23 Et inmarap ed saray binaṅgato, incuantod sicaran boc-
bocod : Mapalad so saray mata á macanengneng ed saray
nanengnengyo ;

24 ta cuancod sicayo á daquel so saray profeta tan arari á
quinalictandan nanengneng so saray nanengnengyo et agdara
anengneng ; tan dengelen so saray narenḡelyo, balet agdara
nadngel.

Alimbaoay maong á Samaritano.

25 Et nia, saquey á macabat ed gangan inmalaguey et suma-
lenton nancuan : Managbanḡat, ḡ antoy gaoenco, pian nata-
oidcoy bilay ya andi anggaan ?

26 Et sicato incuantod sicato : ḡ Antoy oalan nisulat ed gan-
gan ? ḡ Panoy panbasam ?

27 Et sicato inmebat á cuanto : Aroenmoy Cataoan á Dios-
mo ed masimoon á pusom, tan amin á camareruam ; tan diad
amin á casilmo, tan diad amin ya isipmo ; tan say caparam á
too á singa sica met á dili.

28 Et incuantod sicato : Maong so ebatmo : gaoenmotan et
nabilayca.

29 Inḡen sicato, lapud labaytoy ompatnag á matunong, in-
cuantod Jesús : ḡ Et siopay caparac á too ?

30 Et si Jesús inmebat et cuanto : Saquey á too, nanlapud
Jerusalem á linmad Jerico, et naplag ed saray tulisan á sicaray
anamsam ed amin ya oalad sicato, et sinugatanda, insan inman-
laran tinainandan manpanpanabos.

31 Et nidingan ya inmacseb so saquey á sacerdote diman á
dalan, et nen anengnengto, linmabas ya inaraoianto.

32 Et ontan met á saquey á Levita nen acasabid asinggued
ed saman á pasen, et anengnengto, linabsananto.

33 Balet saquey á Samaritano nen manaacad, linmad caoa-
laanto et nen anengnengto, atenieg so panangasito.

34 et inmasinggued ed sicato et binedbedtoray suga'to,
pinuyucantoy larac tan alac, et sicutoy inpacabayotod

samay sinacayanto, et inacadtod daraoesan, et pinaganto.

35 Et diad ontomboc ya agueo nen ontainanla angalay duaran denario et initedtod acanabung, et incuantod sicato: Pagaanmo, et ganaganay gastosenmo, no ompaoilac, bayaran-cod sica.

36 ¿ Siopa sirin casid sarayan talo so isipenmon caparan too na samay napelag ed saray tulisan ?

37 Et sicato incuanto: Samay nangoad sicato y panangasi. Nen satan cuan nen Jesús ed sicato: Naca, tan gaoam so ontan.

Si Marta tan si Maria.

38 Et agaoa ta nen manacad, sinmabid saquey á baley; et saquey á biin manngaray Marta so anangcailid sicato diad abungto.

39 Et oalay aguiton manngaray Maria ya inmiorong ed salian nen Jesús á nandengel na salitato:

40 Si Marta balet nataltalibagad daquel á capagaan, et sin-minggued á cuanto: ¿ Cataoan, agmo ta caermenan á say aguic panbocorentoac á manpaga? Ibagampad sicato á tulo-
ngantoac.

41 Balet say Cataoan innebat et incuantod sicato: Marta, Marta, mapagacan toloy tan daquel iray catalibagaanmo:

42 balet sicsaquey so caocolan, et si Maria pinilitoy maong ya ag naecal ed sicato.

Say picacasi Cataoan.

11 ET agaoa á sanen micacascasid saquey á pasen, nen asungpal, incuad sicato na saquey ed saray binangatanto: Cataoan, ibangatmo camin micasi, onong met na inpangiban-gat nen Juan ed saray binangatanto.

2 Et incuantod sicato: No micasicayo, cuanyo: Amami, (ya oalacad taoen) Nagalang comon so ngaranmo. Onsabi comoy panarianmo. (Nagaoa comoy linaoam, no panon ed taoen, ontan met ed dalin.)

3 Itermod sicami comon so canenmin inagueoagueo.

4 Et paandiemod sicami so saray casalananmi, onong na panamaandimi met ed saray amin ya acautang ed sicami. Et agmo cami yacad ed catocso, (ingen ilabanmo camid maugues.)

Alimbaoy caaron magunigon.

5 Et incuantod sicara: ¿Siopa casid sicayoy oalay caaroto, et onla naanid sicato ed pegley labi, et icuantod sicato: Caaro, pabayesmoac pay taloran tinapay:

6 ta saquey á caaroc linman tinmondad siac, et anggapoy idongoc ed sicato;

7 et sicato manlapud loob onebat á cuanto: Agmoac pocaen; say pinto acacapot la, et saray anaco caacdolcora; agco nayariay onbangon tan mangited ed sica?

8 Cuancod sicayo, ta anggan ag onbangon á mangited ed sicato lapud caaroto, peteg á siansian ombangon lapud panguni-gonto et itertod sicutoy amin á caocolanto.

9 Et siac cuancod sicayo: Quereocayo et naitdancayo; mananapcayo et macaromogcayo; ontaogcayo et nalucasancayo.

10 Ta balang saquey ya onquereo, mangaoat; et say mananap, macaromog; et say ontaog, nalucasan.

11 ¿Et siopad sicayoy bangta ama, no say anacto onquereo ed sicutoy tinapay, sicutoy itdantoy saquey á bato? ono sira so quereonto bilang, et sicato, ¿anta sira, itdantoy saquey ya uleg?

12 ¿Ono, onquereo na saquey ya icnol, itedto naanid sicutoy saquey ya alacdan?

13 Sirin, no sicayo á mauguescayo, amtayoy mangited na saray maong á panangarod saray anacyo, ¿ag casi nagcalalon say Amayon mangatataoen mangited na Espiritu Santo ed saray onquereo ed sicato?

Say ayeoday Fariseos.

14 Et sicato peleston papapaoayey saquey á demonio ed

saquey ya umel. Et agaoa á sanen pinmaoay inay demonio, samay umel nansalita, et niquelaoan iray catooan.

15 Balet saray arum ed sicara cuanda: Diad pacapaniari nen Belzebub á macaoley na saray demonio so pamapapaoayantod saray demonio.

16 Et saramay arum susumalenda ya onquequereo irad sicato na saquey á tandan nanlapud taoen.

17 Balet sicato, nen nacabatantoy canonotanda, cuantod sicara: Amin á panarian á naapagapag diad pancocolcolda met lanlamang, nagueba; et say saquey ya abung á naapag, naguebad saquey ya abung.

18 Et no si Satanás nasiansian ya onsungpad sication dili, ¿panoy yalaguey na panarianto? Ta cuanyo á diad pacapaniari nen Beelzebub so pamapapaoaycod saray demonio.

19 No siac et papaoayencoray demonio lapud pacapaniari nen Beelzebub, ¿saray anacyo siopay pamapapaoayanda? canian sicaray ocomyo.

20 Balet no lapud tamoroy Dios so pamapapaoayancod saray demonio, mapatnag ta say panariay Dios sinmabid sicayo.

21 No say mabayani siaayuran bantayantoy silunganto, amindaray cayarianto mareen ira:

22 balet no onsublay so mabayani nen sicato, sication taloento, tan ecalentoy ayuran panilaloanto, tan ibuyactoy cayarianto.

23 Say agmibiang ed siac, sungpad siac; et say agmantipon ya ibac, mangibuyac.

24 No say espiritu mabanday macapaoay ed too, manacad ed saray pasen ya amaga á mananap na inaoa, et sano agto naromog icuanto: Ompaoilac ed abungcon pinaoayanco.

25 Et sano onsabi, naromogton apanisan tan aparaquep.

26 Diad satan ompaoil tan mangala ni arum á pitoran espiritu mabanday ni nen sicato, et diad caloobda manayam iradman, et say casungpalay sayan too ompaoay á lalon mau-gues nen say inmuña.

27 Et agaoa á sanen sasalitaentoraya, saquey á biid samay caraclan incasiltoy vocesto et incuantod sicato: Mapalad so egues ya angaoit ed sica tan saray soson sinosoanmo.

28 Balet sicato cuanto: Lalon mapalad niray ondengēl na salitay Dios tan sicato y onorenda.

Say tanda nen Jonás.

29 Et nen nantitipon iray daquel á too diad sicato, inggapotoy nancuan: Maugues yan capulian; anapentoy tanda et anggapoy arum á tandan niited ed sicato no ag say tanda nen Jonás.

30 Ta onong á si Jonás so tanda oarid saray Ninivitas, ontan met, say Anac na too sicato y tanda ed sayan capulian.

31 Say biin Ari diad abalaten onalaguey ed panangocoman ed saray tood sayan puli et dusaentora: ta nanlapud saray casangpotay dalin linman nandengēl na cacabatan nen Salomon; et nia, baleb nen si Salomon so oalad sicayo dia.

32 Saray tootod Ninive onalaguey irad panangocoman ed sayan capulian et sicato y dusaenda; ta nagpataolirad inpanbangat nen Jonás; et nia, saquey á balbaleb nen si Jonás so oadia.

Say sileo na laman.

33 Anggapoy too á sanen anelsel na saquey á sileo yantod sanib ono diad silong na salop, no ag ingēn diad candelero pian saray onloob nanengnengday sileo.

34 Say sileo na laman sicato y mata: no say matam macail, amin á lamanmo masnag met; balet no maugues, ontan met say lamanmo ambilunget.

35 Nengnengenmo, sirin, á say sileo ya oalad sica, alioa comon ya ambilunget.

36 No say amin á lamanmo et masnag ya anggapoy pasenton ambilunget, sicato y amin masnag á singa sileo no sinagantocad sileoto.

Si Jesús balaoentoray Escribas tan Fariseos.

37 Et nen mansasalita, aquicasiay saquey á Fariseo á mican comod sicato: et linmoob si Jesús et dinmongon mangān.

38 Et samay Fariseo nen nanengnengto'ya, nanquelao lapud ag nanuras nen cuantoy mang'an.

39 Et say Cataoan cuantod sicato: Natan sicayon Fariseo punasanyoy paoay na vaso tan lipong; balet say loobyoy napnoy panagsamsam tan caugsan.

40 Maculangculang, say nanggaoad paoay ag casi sicutoy angaaoa met ed loob?

41 Ingen, ipayabolyoy oalad sicayo, et nia, nalinisay amin á bengatlad sicayo:

42 Balet, abagueycayo lan Fariseos ta manbayadcayo na cacapolyoy yerbabuena, say ruda tan amin á pising; et paliisan-yoy catunongan tan panangaroy Dios. Balet sarayan bengatla nepegyo comon á guinaoa ya agyo pinaolian á guinaoa na saray arum.

43 Abagueycayo lan Fairesos ta calictanyoray manonan yurongan diad saray sinagoga tan saray panangibano diad plaza.

44 Abagaueycayo la ta singacayo saray loboc ya ag naneng-neng, et saray manacad ed tapueoda agda amta.

45 Et inmebat so saquey ed saramay macabat ed gangan et incuantod sicato: Managbangat, diad inpansalitam na saraya, balaoenmo cami met.

46 Et sicato incuanto: Abagueycayo met, macacabat ed gangan, ta pansacбатыoray totoo ed saray aoit ya ambelat á toloy ya aoiten; et agyo met dioiten so saray aoit ed saquey bengat á tamoroyo.

47 Abagueycayo la ta ipaalagueyoray loboc na saray profetas, et pinatey ira na saray amayo.

48 Tuan pueteg, sicayoray tasi et paabiguenyoray gaoa na saray amayo; ta tuan pinateydara, balet sicayo ippaalagueyo-ray lobocda.

49 Canian, say cacabatay Dios cuanto met: Ibaquic ed sicara so saray profetas tan apóstol; et daquel ed sarayay pateyenda tan pairapenda;

50 pian nasingil ed sayan puli so dala na amindaray profeta á naibong nanlapud incapalsay mundo;

51 nanlapud dala nen Abel anggad dala nen Zacarias ya

inatey ed nanleelay altar tan say santuario : on, cuancod sicayo, nasingil naanid sayan puli.

52 Abagueycayo la, macacabat ed gangan ta inecalyoy tom-boc na cacabatan ; agcayo linmoob, et sinebelanyoray onloob comon.

53 Et nen pinmaoay diman, saramay Escribe tan Fariseo guinmaporan nanpasnoc na ontan lad sicato et inayatdan mansalitay daquel nin bengatla ;

54 ya oalaran manaalagad ed sicato á mangêrel ed antoca-man ya manlapud sangito.

Siopay nepeg á tacotan.

12 ET nen ontan á nantitipon so libolibon too ya ontanlan mangagatinay saquey tan saquey, inggapoton incuan ed saray binangatanton inmuna : Manlicascayo ed levadura na saray Fariseo, ta sicatoy pacalala.

2 Ingen anggapoy asacbongan ya ag nipatnag ; tan niamot ya ag nacabatan.

3 Capian amin á sinalitayod ambilunget narengel ed malioa-
oa ; et say sinalitayon inyesaes ed saray silid á caraldalman
nilapag naani manlapud tuctuc na abung.

4 Et cuancod sicayo, cacaaroc : agcayo antacot ed saray ma-
matey na laman, et cayaritonia anggapoy arum á nayariandan
gaoen.

5 Ingen ibangatcod sicayo, no siopay tacotanyo. Taco-
tanyomay oalay pacayarito á mangipelag diad infierno, cayari
pamategyto : tuan cuancod sicayo : Tacotanyoman.

6 ; Ag casi nalaco so limaran manoc ed duaray cuarta ? Et
anggan saquey ed sicara anggapoy nalingoanan diad arap na
Dios.

7 Anggan saray buec na oloyo abalang iran amin. Agcayo
antacot : mablicayo nen saray daquel á manoc.

8 Et cuancod sicayo ya amin á mangipatnag ed siac diad
arap na saray totoo, sayay Anac na too sicatoy ipatnagto met
ed arap na saray angel na Dios ;

9 balet say mangiburid siac ed arap na saray totoo, niburi met naani ed arap na saray angel na Dios.

10 Et amin á mansalitay sungpad Anac na too napaandi casalananto ; ingen say mansalitay maugues ed Espiritu Santo ag naandi napaandi casalananto.

11 Et sano idongodacayo ed saray sinagoga tan diad saray pangolo tan diad saray macaoley, agyo capagaan no panon ono antoy yebatyono salitaenyo :

12 ta say Espiritu Santo ibangattocayo naani ed satan met lanlamang ya horas no antoy nepegyon salitaen.

Alimbaoay mayaman ya andi licnaan.

13 Et incuad sicato na saquey ed saramay daquel á too : Managbangat, ibagam ed quienen aguic ya yapagantoac na taoid.

14 Balet incuantod sicato : Too, ¿ siopay angiad siac á mangocom ono mangapag ed sicayo ?

15 Et incuantod sicara : Nengnengenyono et manlicascayo ed amin á caagapan ; ta say bilay na too alioan oala ed caraquei na saray cayaman á bebenbenanto.

16 Et sicato tinongtongtod sicara so saquey ya alimbaoa, ya incuanto : Say dalin na saquey á too á mayaman binmungay daquel :

17 et no nonnonotentod linaoato, á cuanto : ¿ Antoy gaoaenco naani, ta anggapoy pangiatolancod saray bungac ?

18 Et incuanto : Gaoaenco'ya : iguebac so saray camalidco, et ipaalagueycora naanin balbaleg, et yatolcon amin diman so ganaganay trigoc tan cayamananco.

19 Et cuanco naanid camareruac : Camarerua, daquel iray cayamanan ya inyamolmo á tadiad daquel á taon ; manpainaoaca, manganca, uninomca, manliquetca.

20 Ingen incuad sicutoy Dios : Maculangculang, natay labi onsabiray mangalay camareruam, et saray oalan intadiam ¿ siopa naani mancayariad sicara ?

21 Oniay mantipon na cayamanan á nitadiad sicato, et alioan mayaman ed Dios.

Say capagaay bilay.

22 Et incuantod saray binangtato: Canian cuancod sicayo: agqui mapagad bilayo no antoy canenyo, tan diad lamanyo, no antoy caoesenyo.

23 Say bilay mabli nen say canen, et say laman mabli nen say caoes.

24 Nonotenyoray oaoac ya ag ira mantanem tan manani; ya anggapoy pantiponan tan camalidda; et say Dios so managanod sicara. ¿Agqui casi mabli nen saray oaoac?

25 ¿Et siopa casid sicayoy nayarianton yarum, lapud capaganto, so capalduan taclay diad alagueyto?

26 ¿Et no ag yo nayariay dagdaiset, aquit mapagacayod arum?

27 Dalepdepenyoray lirios no panoy catotobora: ag ira mansagpot tan maninaramey: et cuancod sicayo, ta anggan si Salomon ed ganaganay pacayarito, ag nancaoes á singa saquey ed sicara.

28 Et no ontan so pangaoes na Dios ed dica ya oala natad dalin, et nibantac nabuas ed apuy; ¿panoy gaoentod sicayo, totoon maquisid á pananisia?

29 Agqui sirin onong mapagad canenyo, ono say inumenyo, ya agyo met gotgotey linaoayo.

30 Ta amindaranian bengatla anapendaray totoon mangaral dalin; balet say Amayo amtaton caocolanyo'raya.

31 Anapenyo, sirin, so panariay Dios ya unona, et sarayan amin niarum ed sicayo.

32 Agqui antacot, daiset á papastolanco, ta calictan nen Ama ya ited ed sicayoy panarian.

33 Ilacoyoy oalad sicayo, et mamayabolcayo: manggaoacayoy supot ya ag ondaan, saquey á cayamanan ya ag onculang ed taoen á sicutoy ag nasabi na mataqueo tan ag met naderal na taboney.

34 Ta no ined so caoalaay cayamananyo, diman met so caoalaay pusoyo.

Alimbaoay aripen á maculi.

35 Balquesanyora comoy aoacyo tan acaselsel comon iray sileoyo ;

36 et sicayo comoy singa saray toon manaalagad ed catao-
anda no capigan so ipaoilton manlapod bansal ; pian sano ompaoil et onpatoc, tampol á sicutoy lucasanda.

37 Mapalad iray aripen á sano onsabi cataoanda naromog-
toran aliing : cuancod sicayon tua, á balquesantora tan payoro-
ngentorad dulang, et onla tan manservid sicara.

38 Ya anggan onsabid pegley labi, tan anggan onsabid pal-
bangon, et naromogtoran ontan, mapalad iran aripen.

39 Saya balet, amtaenyo, á no comon amtay macanabung so
horas ya isabi tulisan, ag naoguip tan agto palooban so abung
to.

40 Sicayo met, manlicascayo ; ta diad horas ya agyo isisipen,
onsabi so Anac na too.

41 Nen satan cuan nen Pedro ed sicato : Cataoan, ¿ Inulit-
mod sicami'yan alimbaoa, ono nipaacad ed amin ?

42 Et incuay Cataoan : ¿ Siopa, sirin, so dispen á napanma-
talecan tan macalacal, ya iyan nen Cataoanto á manbantay
ed saray tood abungto, pian sano canepaganto itedtod sicara so
nabebetangandan tagano ?

43 Mapalad imay aripen, á sano onsabi so Cataoan, naro-
mogton manggagaoay ontan.

44 Tua á cuancod sicayo á sicutoy igatonto á manbantay ed
ganaganay cayamananto.

45 Balet no satan ya aripen icuantod pusoto : Say Cataoanco
matantan ya onsabi, et gapoanton sugatan so saray aripen á
lalaqui tan bibii, et mangān tan oninom tan manbuec ;

46 onsabi Cataoan na saman ya aripen diad agueo ya agto
ilaloan, tan horas ya agto amta, et papaliisento tan iyantoy
nabebetanganto ed saray ag napanmatalcan.

47 Et say aripen ya acatalos na linaoay Cataoanto, et ag
nanparaan et agto met guinaoa onong ed linaoato, nabācbac
na daquel.

48 et say ag acatalos, et nanggaoad saray manepag ed bacbac,

nabacbac na daiset : ta anggan siopa á naitday daquel, dacda-quel met so nasingil ed sicato.

Si Jesús ilobtoy apuy tan subaquil diad dalin.

49 Linmaac dian mangiay apuy ed dalin ; ¿ et anto ni labay-co no oalalan aselselan ?

50 Balet oalay paminiagco á caocolancon cabiniagan, et agay-lay irapco anggad ag nasungpal.

51 ¿ Isipenyon linmaac diad dalin á mangited na careenan ? Andi, cuancod sicayo, no ag say subaquil.

52 ta manlapud natan manbibiiigan iray limara ed saquey ya abung ; taloray onsungpad duara ; et duaray onsungpad talora.

53 Manbibiiigan ira naani, say ama onsungpad anac á laqui, et say anac á laqui onsungpad ama ; say ina onsungpad mari-quí'to, et say mariquit onsungpad ina ; say catulangan á bii onsungpad manugangton bii, et say manugang á bii onsungpad catulanganton bii.

Saray tanday panaon.

54 Et incuanto met ed saray catooan : No nalicasyoy lurem á manlapud dapit sagud, cuanyon tampol : oran so onsabi ; et ontan lanti.

55 Et no manlapud abalaten so daguem, cuanyo : ampétang naani et oalay petang.

56 Pacalala, amtayon ibiig so nengneng na taoen tan dalin ; ¿ balet panon itan et agyo amtan ibiig yan agueo ?

57 ¿ Et aquit anggan diad sicayon dili agyo isipen so catunongan ?

58 No onlacad ocom ya ibam so cacolcolmo, pagaanimod dalan so quilabanmod sicato, pian agtoca iguyod ed ocom et say ocom itedtocad alguacil, et say alguacil ilobtocad panangipangaoan.

59 Cuancod sica ya agca macapaoay diman anggad agmo nabayaran so caonoran á maravilis.

*Say inpamatey ed saray Galileos tan say
ilang ed Siloe.*

13 DIAD saya met lanlamang á panaon, oalaradmay pigaran totoon angulit ed sicato na nipaacad ed saray Galileos, ya inlaoc nen Pilatoy dalarad saray bagatda.

2 Et innebat si Jesús á nancuan ed sicara: ¿Isipenyon sarayan Galileos, lapud inacora'ya, laloran managcasalanan nen saray amin á taga Galilea?

3 Andi, cuancod sicayo; ingen no ag cayo manpataoli ompatey cayo met á singa sicara.

4 Ono saray labinoalon atapilan ed ilang ed Siloe, et inatey ira, ¿isipenyon laloran managcasalanan nen saray amin á toon manaayam ed Jerusalem?

5 Andi, cuancod sicayo; ingen no ag cayo manpataoli, ompatey cayo met ya ontan.

Alimbaoay hiqueran lepes.

6 Et inuli'toyan alimbaoa: Saquey á too oalay saquey á quieo ton higos á nitanem ed cauvasanto, et linman nananap na bungato, et ag acaromog.

7 Et incuantod manbabantay na cauvasan: Nia, taloy taon la ya oonlaac dian mananap na bungay sayan quieo ya higos, et agac macaromog; popoenmo, ¿aquit daraquento ni dalin?

8 Nen satan innebat ed sication nancuan: Cataoan, pao-lianmo nid sayan taon, anggad pacacotcotco ed abayto et inancoy tabon á pamabona:

9 et no manbungad saman la, maong; et no andi, popoenco.

Incatambal na saquey á biin ag macagalao.

10 Et nanbangat ed saquey á sinagoga diad sabado.

11 Et niay saquey á bii ya oalad sicutoy espirituy beblay á labinoaloy taon la, et oalan abocot, ya anggan panon ag to nayariay manpetec.

12 Et canengneng nen Jesús, tinaoagto tan incuanto : Bii, nilabanca lad saquitmo.

13 Et iniantod sicato so limato'ra, et tampol á nanpetec, et inggalangtoy Dios.

14 Et say pangolod sinagoga, sipapasnoc lapud anambal si Jesús diad sabado, inmebat et incuantod daquel á too : Oalay anem agueo á macanan panquimeyan ; diad saraya sirin so idagoyon manpatambal, et alioan diad agueo na sabado.

15 Et say Cataoan inmebat ed sication nacuan : Pacalala, saquey tan saquey ed sicayo, ¿ agyo casi ocbaran ed agueo na sabado so vacato ono asnoto diad atotong, et yacadton painumen ?

16 Et sayan biin anac nen Abraham, nian binalod nen Satanás ed loob na labinoalay taon, ¿ ag casi manepeg ya ocbaran ed sayan incabalod, ed agueo na sabado ?

17 Et nen asalitato'raya, abaingay amin á cabosolto : et lapagday daquel á too nanliquetanda'raman á bengatla á napnoy gloria á guinaoato.

Alimbaoay buquel na mostaza tan say levadura.

18 Incuanto, sirin : ¿ Antoy caolibay na panariay Dios, tan anto casi pangialilinganco ?

19 Alilingtoy buquel na mostaza ya inalay saquey á too et insibuagtod panagtanamananto ; et binmaleg et nagmalio á quieo et saray manoc ed taoen nanobong irad casangaanto.

20 Et inuli'to lamet ya incuan : ¿ Antoy pangialilingancod panariay Dios ?

21 Alilingtoy levadura, ya inalay saquey á bii et tinabonanto na talon casucat ya arina, anggad inlebag na amin.

Say caput á mainget.

22 Et inacadtoy amin á ciudad tan binalaybaley á nanbangat, et linmad Jerusalem.

23 Et incuad sicatoy saquey : Cataoan, ¿ daiset iray nilaban ? Balet sicato incuantod sicara :

24 Panpilitanyoy onloob ed pinton mainget; ta cuancod sicayo á daquel iray manseet ya onloob, et agda nayarian.

25 Sano say amay sangcaabungan inmalaguey la tan inca-po'to lay pinto, et onggapo cayon manalaguey ed paoay, tan ontaoag ed pinto á cuanyo: Cataoan, *Cataoan*, lucasanmo cami; et sicato onebat et cuantod sicayo: Agta cayo cabcabat no taga ined cayo;

26 diad satan igapoyon icuan: Diad arampo angan tan inminumcami et diad saray daladalanmi nanbabangatca;

27 et icuanto: Cuancod sicayo ya agco cabat no taga ined cayo; onarai cayod siac sicayon amin á managgaoay maugues.

28 Dimad satay nangis tan ngayet na ngipen, sano naneng-nengyoy Abraham, tan si Isaac tan si Jacob, tan saray amin á profeta diad panariay Dios, et nanengnengyo á sicayon dili napapaoay.

29 Et ondagoran manlapud buquig tan sagud, tan manlapud baybay tan abalaten, et oniorong irad panariay Dios.

30 Et nia, oalaray naonod á macaona; et oalaray ononan naonod ira.

Ibagarad Jesús á manlicas ed quienen Herodes.

31 Sanen saman met lanlamang ya horas sinmabiray arum á Fariseo á nancuad sicato: Ompaoayca et ontainanca dia, ta si Herodes labayto can pateyen.

32 Et incuantod sicara: Nácayo et cuanyod saman á masilib ya ayep: Nia, papaoayencoray demonio, et manambalac natan tan nabuas, et diad comatlon agueo anggapoy pínculan-ganco.

33 Anggaman ontan nepegcoy manacad natan tan nabuas, tan diad agueo ya ontomboc; ta ag nayari á say saquey á profeta ompatey ed paoay na Jerusalem.

34 Jerusalem, Jerusalem, á mamatey ed saray profeta et topaquenmoray nibaquid sica: aminpigan quinalictancon tiponen comon so saray anacmo, onong na nganac equemanto'ray siosioto ed silong na payacto, et agmo linabay.

35 Nia á say abung yo natainan ed caingueoan ; et cuancod sicayon agyoac la nanengneng naani, anggad pangicuanyo : Mapalad so onsabi ed ngaray Cataoan.

Incatambal na saquey á linmarag.

14 ET agaoa á nen linmoob ed abung na saquey á panglo'ray Fariseo, diad saquey á sabado, á mangay tinapay, sicutoy sinisiimda.

2 Et nia, saquey á toon linmarag oala nen saman diad arapto.

3 Et inmebat si Jesús, ya aquisalitaanto'ray mangacabat ed gangan tan saray Fariseo, á nancuan : ¿ Manepeg casi manambal ed agueo na sabado ono andi ?

4 Et ag ira inmesel. Nen satan inalatoy too, et tinambalto tan imbaquito.

5 Et incuantod sicara : ¿ Siopad sicayoy oalay asno man ono vaca á naplag ed bobon, et agto agoaten á tampol ed agueo na sabado ?

6 Et agda ayarin inebatan irayan bengatla.

Alimbaoay manonaan iran yoronḡan tan saray binagaan.

7 Et nen nalicasto no panoy panpipili na saray binagaan ed saray manonaan á yoronḡan, inuli'toy saquey ya alimbao, á cuantod sicara :

8 No oalay manaoay ed sica diad bansal, agca onyorong ed manonaan á yoronḡan, ompan oalay mapagalang nen sica á binagaanto,

9 et no onsabi'may anaoag ed sica tan diad sicato, cuantod sica : Itdanmoy pasen'ya ; et diad satan, mancalcalnaca naanin napnoy baing á mangalay caonoran á yoronḡan.

10 Balet no nataoagca, onlaca, et onyorongca ed caonoran á pasen ; ta no onsabi anaoag ed sica, cuanto naanid sica : Caaro, ompasencad atagtaguey ; diad ontan oala naani galangmo ed saray miarap ed sica diad pananganan.

11 Ta amin á mamaataguey ed sication dili, napaabeba naani ; et say mampaabeba, napaataguey naani.

12 Et incuanto met ed samay anaoag ed sicato : No manggaoacay canen ono pangdeman, agmo taoaguen iray caarom, anggan saray agaguim, anggan saray cacanayonmo, anggan saray caababaymon mayaman ; ompan lamang no paolendaca met á taoaguen et gaoendad sica so saquey á gongona,

13 Balet no manggaoacay doypoan, taoagmoray duruca, saray apotday lima, saray piley, saray bulag ;

14 et mapaladca naani ta anggapoy nitomangdad sica ; et natomanganca naanid quiolid bilay na saray matunong.

Alimbaoay baleg á panamangdem.

15 Et nen narenḡel 'ya na saquey ya aquironḡod sicato diad pananganan, incuantod sicato : Mapalad naani mangay tinapay diad panariay Dios.

16 Balet incuantod sicato : Saquey á too nanggaoay baleg á pangdeman et anaoag na daquel :

17 et diad horas na panamangdem inbaquito y aripenton nancuan ed saray binagaan : Dagocayo, ta oala lan nitadian amin.

18 Et sicaran amin guinmaporan nanbaraan á nanbabansag. Say inmuḡa cuantod sicato : Analioac na saquey á dalin et caocolancoy ompaoay, á nengnengenco'man : quereocod sica ya itepelmoac.

19 Et incuay saquey : Analioac na limaran capares á vaca et laenco'ran salien ; quereocod sica ya itepelmoac.

20 Et incuay saquey : Capangcasacasalco, et agac macapila nisenḡeg ed saya.

21 Et nen pinmaoil imay aripen, impacaba'torayan bengatla ed cataoanto. Nen satan nanpasnoc so ama na sancaabungan et incuantod samay aripento : Ompaoaycan maganganat ed saray daladalan, tan diad saray lantangay ciudad, et yacadmora dia so saray duruca, saray apotday lima, tan saray bulag, tan saray piley.

22 Et cuay aripen : Cataoan, agaoan onong na inbilinmo, et oala ni pasen.

23 Et incuantonmay cataoan ed samay aripen : Onpacaycad saray dalan tan diad saray alad, et pasootenmoran onloob, pian napanoy abungco.

24 Ta cuancod sicayon anggapod saray totoon ataoag so macataoay na canenco.

Alimbaoay caculian.

25 Et daquel iray totoon ontotomboc ed sicato, et sanen inmarap cuantod sicara :

26 No siopaman ya onlad siac, et agto gulaen so amato, tan si inato, tan say asaoato tan saray anacto, ton saray agaguito, tan say bilayto met, ag nayari á sicatoy binangatanco.

27 Anggan siopaman ya agto aoitey cruzto, tan ontomboc ed siac, ag nayari á sicatoy binangatanco.

28 Ta ¿siopad sicayo so, anta labaytoy mamaalagney na saquey ya ilang, ag oniorong ya onona pian bilangentoy nagasto, et nengnenengento no oalad sicato so caocolan á panungpal?

29 Ompan lamang no ayarito lan inyay cimienta et agto nayaran sungpalen, amindaray acanengneng gapoandan balaoen,

30 a cuanda : ayan too angigapon amaalagney et agto ayarin sinungpal.

31 Ono ¿siopay ari, á sano onlan mamacal ed sananey ya ari, ag oniorong ya onona, et nonotento no oalay pacayarito, bangta sansampolon libo so oalad sication nayaran yarap ed onsabin mamacal ed sicato, á mangitaroc na duampolon libo?

32 Ta no andi, sano say sananey ya ari oala nid araoi, mangigangan naani mipacnad sicato ed saray nengneng na careenan.

33 No ontan sirin, anggan siopaman ed sicayo ya agto benegan so saray amin á cayarian á bebenbenanto, agto nayari á sicatoy binangatanco.

34 Maong á cagot so asin ; ingen no anggan pati say asin naandi taoayto, ¿anto ni napangasin?

35 Ag onnepeg ed dalin tan anggan diad panagbantacan na

pamabona ; ibantacdad paoay. Say oalay layag á pandenġel, ondenġel comon.

Alimbaoay carnero tan dracman abalang.

15 ET Inmasinggued irad sicato so amin á sumisingil na buis tan saray managcasalanan ya ondedenġel ed sicato.

² Et manngengeniray Fariseo tan saray escriba á cuanda : Saya aotento ray managcasalanan et mican ed sicara.

³ Et sicato impalioaotod sicara so sayan alimbaoa, á cuanto :

⁴ ¿Siopay tood sicayo ya oalay sanlasus á carneroto, et nabalang so saquey ed sicara, agto tainan ed laoac so saray siam á polo tan siam, et laenton anapen so abalang anggad agto pacaromog ?

⁵ Et sano aromogto la, sicutoy yantod abalato á sililiquet.

⁶ Et sano onsabid abung, tiponentoray cacaaroto tan caabayto, á cuantod sicara : miliquet cayod siac, ta aromogcoy carneroc ya abalang.

⁷ Cuancod sicayo, ya ontan met á nagcalaloy liquet ed taoen nisenġeg ed saquey á managcasalanan á magbabaoi, nen diad saray siam á polo tan siam á matunong ya agda caocolay pagbabaoi.

Ono, ¿siopay biin oalay sampoloran dracmato, no nabalangtoy saquey á dracma, ag manelsel na sileo et panisantoy abung, et anapenton seetan anggad naromogto ?

⁹ Et sano naromogto, tiponentoray cacaaroto tan caabayto, á cuanto : Miliquet cayod siac, ta aromogcoy dracma ya abalangco.

¹⁰ Ontay cuancod sicayo ya oalay liquet ed arap na saray angel na Dios nisenġeg ed saquey á managcasalanan á magbabaoi.

Alimbaoay anac á managdarac.

¹¹ Et incuanto : Saquey á too oala nen samay duaran anacton laqui :

12 et samay yogtan incuantod quíenen amato : Ama, itedmod siac so caarumay cayarianmon nabebetanganco. Et inapagtod sicara so cayariato.

13 Et nen linmabas so alioan anduquey ya agueo, say yug-tan ya anac tiniponton amin so cayariato et linmad saquey á dalin ya araoi ; et diman dinaractoray cayariato á nanbilay na marelmeng.

14 Et nen nagastos to larañ amin, sinmabid saman á dalin so baleg ya eras, et sicato guinmapon nanlicnay irap.

15 Et linma et inmasinggued ed saquey ed saray ombaley ed saman á dalin, et sicatoy inbaquitonman ed saray dalinto pian manalilay babuy.

16 Et quinalictanton panoey eguesto ed saray algarrobas á canendaray babuy ; et anggapoy angited ed sicato.

17 Balet nen nannunot, incuanto : Pigapigaray miopa ed abung nen amac ya daacay tinapayda, et siac ompateyac dia ed eras.

18 Onalagueyac naani et onlaac ed quíenen amac et icuan-co naanid sicato : Ama, nancasalananac ed onsungpad taoen tan diad arapmo :

19 agac la onnepeg ya ingaray anacmo ; yanmoac á singa saquey ed saray miopopad sica.

20 Et inmalaguey et linmad quíenen amato. Balet nen araoi ni sicatoy anengneng nen amato, et atenieg so panangasito, et binmatic et linacaptod becleo, et sicatoy inaangobanto.

21 Et incuay anac ed sicato : Ama, nancasalananac ed onsungpad taoen tan diad arapmo ; agac la manepeg á taoguey anacmo.

22 Ingen si amato incuantod saray aripento : Ipao'yon tampol so manonaan á caoes, et sicatoy caoesanyo, et yanyoy saquey á singsing ed limato, tan sapin ed saray salito ;

23 et aoityoy machorran vacan mataba et pateyenyo ; et mangān itayo tan manliquet itayo :

24 ta sayay anaco inatey et inmolid bilay ; abalang et aromog. Et guinmaporan nanliliquet.

25 Balet samay anacton pangoloan oala nen saman diad caomaan ; et sicato nen sinmabi, tan immasinggued ed abung, nadngeltoy togtog tan sayao.

26 Et nen tinaoagtoy saquey ed saray aripenda, tinepeto'd sicato no anto'man casi.

27 Et inmebat ed sicato: Si aguim sinmabi; et si amam pinateyto so mataban machorra, lapud inaoa'ton ag naano.

28 Ingen nanpasnoc et agto linabay so linmoob. Et pinmaoay so amato, et aquicasianto.

29 Balet sicato inmebat et incuantod quienen amato: Nia, ed pigaran taon ya inpanservic ed sica, anggan capigan agco sinungpay ganganmo, et anggan capigan ag moac initdan na anggan melag á canding, pian panliquetancod saray caaroc:

30 Ingen casabi na sayan anacmo, ya inopo'toy cayarianmod saray maugues á bibii, pinateymon ingganad sicato so vacan apataba.

31 Et sicato incuantod sicato: Ana'co, sica naynaycad siac, et amin á quienco, quienmo.

32 Balet acaocolay panliquet tan pananbeguia, ta sayay aguim inatey et inmolid bilay; tan abalang et aromog.

Alimbaoay dispen ya ag napanmatalcan.

16 ET incuanto met ed saray binangatan: Oala nen samay saquey á toon mayaman ya oalay saquey á dispen diad abungto; et saya indalemdad sicato á mandederal na cayamananto.

2 Et inapo'toy tinaoagto et incuantod sicato: ¿Anto'yay narengeludo á sica? Ipatnagmoy inpanpagam, ta ag mo la nayari mandispen.

3 Et samay dispen incuantod linaoato: ¿Anto naani gaoaenco?, ta say cataoanco ecalentod siac so incadispenco. Mancotcot, agco nayarian; mipayabol, ambaingco.

4 Amtac so gaoaenco naani, pian diad caecalcod incadispen, acoendaac naanid caabunganda.

5 Et nen tinaoagton sinansaquey so saray acautang ed quienen cataoanto, incuantod inmuna: ¿Pigaray utangmod quienen cataoanco?

6 Et sicato cuanto: Sanlasus pasig á larac. Et incuantod

sicato : Aoatenmoy sulatanmo, et yorongcan tampol tan isulat-moy limampolo.

7 Diad cayarito, incuantod saquey : ¿ Et sica, pigaray utangmo ? Et incuanto : Sanlasus cavan á trigo. Et incuantod sicato : Aoatenmoy sulatanmo et isulatmoy oalompolo.

8 Et indayeo na cataoanto so samay ag napanmatalcan á dispen, lapud nanpamaacaran á macalcalacal, ta saray anac na sayan panaon lalon masilib irad saray capolianda nen saray anac na sileo.

9 Et cuancod sicayo : Gaoenyoy micaarod saray cayamanay caugsan, pian diad panculangyo, awatenda cayod saray ayaman ya andi angaan.

10 Say matood ed daiset, matood mét ed daquel ; et agmatunong ed daiset, alioa met á matunong ed daquel.

11 No bangta diad saray cayamanay caugsan agcayo napanmatalcan, ¿ siopa naani mangimatalec ed sicayo ed saray tuan cayamanan ?

12 Et no diad cayariay sananey agcayo acapanmatalcan, ¿ siopa naani mangited ed sicayo na cayarianyo ?

13 Anggapoy aripen á macapanservid duaran cataoan : ta ompan gulaento naani saquey et aroentoy saquey, ono minonong ed saquey et modmoraentoy saquey. Agyo nayariay manservid Dios tan diad saray cayamanan.

Say pacapaniari gangan.

14 Et dengdenglen irayan amin na saray Fariseo á maagum et sicator linodloreya.

15 Et incuantod sicara : Sicayo'ray mangigagalang ed lamanyo met lanlamang ed arapdaray totoo ; ingen say Dios amtato'ray capusoanyo ; ta say ataguey ed saray totoo, cagola balet ed arap na Dios.

16 Say gangan tan saray profeta sicaray asungpal anggad Juan : nanlapu lad saman, say evangelioy panariay Dios nipacabat, et amin manpabisqueg iran onsungpad sicato.

17 Ingen maininomay á nabalang so taoen tan dalin nen say napelag so saquey á tilde ed gangan.

18 Balang saquey á mangisiad asaoaton bii et mangasaoay sananey, mancasalanan ed piload agto asaoa.

Alimbaoay saquey á mayaman tan si duacan Lazaro.

19 Oala nen samay saquey á too á mayaman et nancacões na purpura tan abel á mayumis, et inagueoagueo á manliliquet na ontan la :

20 et saquey á mipapayabol á manngaray Lazaro, oala nen saman á sinmaral ed pintoto, á napnoy sugasugat ;

21 et calictantoy napesel ed saray micmic á napelag ed panangananton'may mayaman : et anggan saray aso dinmagoran nandildil ed saray suga'to.

22 Et agaoa á samay mipapayabol inatey et inyacad na saray angel ed acoalan nen Abraham : et inatey met imay mayaman et nicqtot.

23 Et dimad Hades intangayto'ray matato, nen nanairapan, et anengnengto si Abraham diad araai, tan si Lazaro diad acoalanto.

24 Et sicato innaquis, et incuanto : Ama Abrahami, casianmoac, et igangamo si Lazaro, ta ibasato comoy ngoroy tamoroto ed dantum, et pabtelantoy dilac ; ta oalaac ed irap na sayan dalang.

25 Balet incuad sicato nen Abraham : Ana'co, nonotenmon inaoatmo lay inaoam ed agueo ya inpanbilaymo, et si Lazaro ontan met inaoa'toray irirap : ingen sicutoy naligloa'dia, et oalacad cairapan.

26 Et sananey ni'yan amin, niyan so saquey á baleg á caaralman diad nanleetantayo, sicami tan sicayo, pian saray maliquet dian ombalicsat ed sicayo agda nayarian, et pian anggan manlapud'tan anggapoy ombalicsat ed sicami.

27 Et incuanto : Quereoenso sirid sica, ama, ya iganganmo comod abung nen amac ;

28 ta oalay limaran aguic ; et pian paletantod sicara, ompan lamang met no onladia'rad pasey irap.

29 Ingen si Abraham incuanto : Oalad sicara si Moisés tan saray profetas : denglendara comon.

30 Et sicato incuanto : Andi, ama Abraham : balet no onlad sicara comon so saquey á manlapud saray inatey, magbabaoira naani.

31 Inġen incuantod sicato : No agda denglen si Moisés tan saray profeta, ag ira met manisia no oalay saquey ya onolid bilay ed saray inatey.

*Saray senġeg na cagapolan, saray maugues á gaoan
acoentayo tan say casil na gangan.—Saray
aripen ya anggapoy cacanaanda.*

17 ET incuantod saray binangātanto : Ag nayari ya ag onsabi so saray senġeg na cagapolan ; inġen abaguey lay toon panlapuanda.

2 Magmaong comod sicato, no nisinged ed becleotoy saquey á batoy guilingan et nibantac ed dayat, ya agto inġen icaronias so saquey ed saray anquequelag ya ugugao.

3 Nengnengenyoy ray incasicayon dili. No mancasalanay aguim sicatoy panpasnocanmo ; et no sicatoy magbabaoi sicatoy palabasenmo.

4 Et no mamimpito ed inagueoagueo á mancasalanani na sungpad sica, et mamimpito ed inagueoagueo ya ompaoil ed sica á cuanto : Magbabaoiac ; sicatoy palabasenmo.

5 Et incuandaray apóstol ed Cataoan : Aromanmod sicami pananisia.

6 Et say Cataoan incuanto : No oala comoy pananisiayo á singa buquel na mostaza, et icuanyod sayan sicomoro : Naba-gotca et nitanemcad dayat ; tuloquento cayo.

7 ¿ Et siopad sicayo so oalay saquey ya aripenton manbaca ono managpastol á sano ompaoil á manlapud uma et cuantod sicato : Onloobcan tampol, et dongocad pananganan ;

8 et agto cuan ya ononad sicato : Itadiaanmoac na pang-demanco, et apiguedmoy caoesino et maservicad siac anggad cayaric á mangān tan oninom, et diad casungpalto nia, mangānca naani tan oninomca ?

9 ¿ Misalamat casid aripen lapud guinaoatoy nigangad sicato ?

10 Ontan cayo met, sano agaoayo so amin á nigangad-sicayo,

euanyo : Ariripen cami, ya andi cacanaan ; ta guinaoami nepeg min gaoen.

Incatambal na sampoloran acating.

11 ET agaoa á sanen onlarad Jerusalem, linmabas ed pegley na Samaria tan Galilea.

12 Et nen linmoob ed saquey á baley, inmabet ed sicato so sampoloran cataon acating á tinmondarad araoi :

13 et nanaquis iran cuanda : Jesús, Managbangat, casianmo cami.

14 Et nen nanengnengtora, incuantod sicara : Onlacayo, ompatnagcayo ed saray sacerdote. Et agaoa á sanen manaacad iran onla, atambal ira.

15 Et saquey ed sicara, nen anengnengton sicutoy atambal, pinmaoil ya inggalgalangtoy Dios ed baleg á voces :

16 et indacmomotoy lupatod saray sali nen Jesús ya aquisalamat ed sicato : et saya sicutoy taga Samaria.

17 Et inmebat si Jesús et incuanto : ¿Alioan sampolora casi atambal ? ¿Et saray siamira, ined so caoalaanda ?

18 ¿Anggapoy aromog á pinmaoil ya aquisalamat ed Dios no ag sayan sangcaili ?

19 Et incuantod sicato : Onalagueyca, naca la : say panani-siam pinacsiltoca.

Say panariay Dios ya onsabin ag naamamtaan.

20 ET nen tinepet na saray Fariseo ed sicato, no capigay isabi panariay Dios, inebatanto'ra, et incuanto : Say panariay Dios ag naani onsabin oalay tandan pacanengnengan.

21 Et agda met nicuan : Nia la dia, ono, Nia lad'man ; ta nia, say panariay Dios oalad dalem yo.

22 Et incuantod saramay binangatanto : Onsabi naani'ray agueo á sano calictanyon nengnengen so saquey ed saray agueo na sayay Anac na too, et sicutoy agyo nanengneng.

23 Et cuanda naanid sicayo : Oad'man, ono oa'dia. Agcayo onla et agyo'ra tomboquen ;

24 ta singa say quidmat, á no onquidmat manlapud saquey á pasey lepsag na taoen, onlioaoan anggad sananey á pasey lepsag na taoen, ontan naani'yay Anac na too sano agueoto.

25 Ingen caocolan'in onona á sicato manlicnay daquel, et patainanen na sayan capolian.

26 Et no panoy agaoa ed saramay agueo nen Noé, ontan met ed saray agueo na sayay Anac na too.

27 Mangān ira nen saman, maninom ira, mangasaoa'ra tan miasaoa'ra anggad agueo ya inloob nen Noé diad biong; et sinmabi delap et dineraltoy amin.

28 Ontan met so agaoad saramay agueo nen Lot: mangān ira nen saman, maninom ira, mansalio ira manlaco'ra, mantanem ira, manabung ira;

29 ingēn diad samay agueo ya impaoay nen Lot dima'd Sodoma, inmuran, nanlapud taoen, na apuy tan azufre, et dineralto'ran amin:

30 singa saya, ontan naani ed agueo ya ipatnag nia'y Anac na too.

31 Diad satan ya agueo, say oala naanid toctoc na abung, et saray cayarianto oala'rad abung, ag naani onacseb á mangala ed saraman: et say oalad uma, ontan met naani ya ag onsoned ed beneg.

32 Nonnonotenyo'may asaoa nen Lot.

33 Anggan siopan manpagan mangilabay bilayto, nabalangto, et anggan siopan macabalang, nilabanto.

34 Cuancod sicayo á diad satan á labi oala naani duaran too ed saquey á docolan: say saquey naala naani, et say saquey napaolian naani.

35 Oala naani duaran bii á pelesdan mangguiguling: say saquey naala naani, et say saquey napaolian naani.

36 (Oala naani duaran too diad uma; say saquey naala naani; et say saquey napaolian).

37 Et inmebat ira et incuandad sicato: ¿Ined, Cataoan? Et sicato incuantod sicara: No ined so caoalaay bangcay, diman met naani pantitiponanda'ray aguila.

Alimbaoay Ocom ya ag matunong.

18 ET inuli'tod sicaray saquey ya alimbaoa nipaacad ed caocolan á picacasi laos tan ag pamaandi ilalo ;

² á cuanto : Oala nen samay saquey'a Ocom ed saquey á ciudad, ya agto antacot anggan say Dios, et agto met pagalan-
ngan iray totoo :

³ oad'man met so saquey á biin balo á maparanay á linmad sication nancuan : Isingilmoac ed cabosolco.

⁴ Et sicato agto nilabay ed pigaray agueo ; ingen nen apalabas'ya, incuantod loobton dili : Anggan agco antacot so Dios et anggapoy panamagalangcod too ;

⁵ lapud sayay balo macaalipanes ed siac, gaoaenco naani catunongnan ed sicato, pian ontondan ononlad siac.

⁶ Et incuay Cataoan : Denglenyoy salitay Ocom ya ag matunong.

⁷ Et say Dios agto naani gaoaen so catunongnan ed saray pinilito, ya ontaoag ed sicato ed agueo tan labi, et sicato maanus ni met ed sicara ?

⁸ Cuancod sicayon gaoaento naani catunongnad sicaran tampol. Anggaman ontan, sano onla diay Anac na too, naromogto casi pananisia diad dalin ?

Alimbaoay Fariseo tan comocortais.

⁹ ET inuli'to met'yan alimbaoa ed saray arum á manmamatalec ed incasicaran dili á singa'ra matunong, et modmoraenda'ray arum :

¹⁰ Duan catao linmarad templo á nanpicasi : say saquey Fariseo, et say saquey sumisingil na cortais.

¹¹ Et samay Fariseo, nanalaguey, et aquicasin bocbocodto, na onia : Dios, misalamatac ed sica, ta alioaac á singa saray arum á totoo, á mataqueo ira, alioaran matunong, isalatday asaoa'ra, et alioaac á singa sayay sumisingil na cortais.

¹² Manayunalac na mamidwad saquey simba ; itedcoy caca-poley amin á cayaranco.

13 Balet samay sumisingil na cortais ya oalad' araoi, agto nitangay na anggan mogmo comon so saray matato diad taoen, no ag ingen mandugal ed pagueoton mancuan: Dios, casianmoac á managcasalanan.

14 Cuancod sicayo á saya pimmaoil ed abungto ya apatunong la ingen nen samay saquey; ta anggan siopan mamaataguey ed incasicaton dili, napaabeba; et say manpaabeba, napaataguey.

Si Jesús bendicionanto'ray ugugao.

15 ET inyacadda met ed sicato so saray ugugao ya anquequelag pian tenieguento'ra; ingen sanen nanengneng na saray binangatanto, nanpasnocandara.

16 Ingen si Jesús tinaoagto'ra et incuanto: Paoliano'ray ugugao ya onlad siac, et agyo'ra seblan; ta sicaray acancayariad panariay Dios.

17 Peteg á cuancod sicayo, ya anggan siopan ag mangaoat naani na panariay Dios á singa ugao á saquey, ag naani macaloob ed sicato.

Say balolaquin mayaman.

18 ET tinepet ed sicatoy saquey á macaoley á cuanto: Managbangat á maong, ¿antoy nepegcon gaoen pian nataoidcoy bilay ya andi anggaan?

19 Et si Jesús incuantod sicato: ¿Aquit taoaguenmoac na maong? Anggapoy maong, no ag sacsaquey lambangat, salanti say Dios.

20 Antam iray gangan:

Agca micalogoran,

Agca mamatey,

Agca mantaqueo,

Agca mansalitay alioan tuan pamalet,

Igalangmoy amam tan inam.

21 Et incuanto: Aminda'rania sinungpalcon nanlapud incaugaoco.

22 Et si Jesús nen narengelto'ya, incuantod sicato : Culang nid saquey á bengatla ; ilacom so amin ya oalad sica, et itedmod saray duca, et oala naani cayamananmod taen, et gala, tomboquenmoac.

23 Ingen nen narengelto'rayan bengatla, naermenay baleg, ta mayaman na daquel.

24 Et si Jesús nen nanengnengton naermenan á toloy, incuanto : Agay lay irapdan onloob ed panariay Dios so saray oalay cayamanan.

25 Ta maininomay ya onlabot so saquey á camello ed abut na saquey á dagum, nen say saquey á mayaman, diad panariay Dios.

26 Et saramay acadngel nia, incuanda : ¿ Siopa naani sirin so nilaban ?

27 Et sicato incuanto : Say ag nayarid saray totoo, sicutoy nayarid Dios.

28 Et si Pedro incuanto : Nia, pinaolianmi'ray cayarianmi, et tinombocdaca.

29 Et incuantod sicara : Tuan cuancod sicayo : Anggapoy amaolian na abung ono asaoa, ono agagui, ono atateng, ono anac, á nipaacad ed panariay Dios,

30 ya agto naani aoatey alabas nid bilay aya tan diad arapen á panaon so bilay ya andi anggaan.

• *Si Jesús ipasacbaytoy incairirapto.*

31 ET si Jesús, inalato'ray labindua, et incuanto'd sicara : Nia onla itayod Jerusalem, et nasungpal naanin amin á bengatlan insulat na saray profeta á nipaacad ed sayay Anac na too.

32 Ta niyaoat naanid saray Gentil et naludlurey naani, et napabpabaingan tan naluclucaan :

33 et leotenda naani, et pateyenda ; et diad comatlan agueo onoli naanid bilay.

34 Et anggapod sarayan bengatla so atalosanda, et sayan salita niamot ed sicara, et agda atalosan so nasasalita :

Say bulag ed Jericó.

35 ET agaoa á nen manasinggued ed Jericó, saquey á bulag manyodyorong ed guilig na dalan, á mipapayabol :

36 et nen narengeltoy catooan ya onlalabas, tinepe'to no anto'man casi.

37 Et inpacabatdad sicato ya onlalabas si Jesús á Nazareno.

38 Nen satan, nanaquis á nancuan : Jesús, Anac nen David, casianmoac.

39 Et saramay manaacad ed onaanto, sicutoy nanpasno-canda, pian ag onesel ; ingen sicutoy nanaquis na nagcalalo ni : Anac nen David, casianmoac.

40 Et si Jesús timmunda, et inganganton yacaddad sicato ; et nen sicutoy immasinggued, tinepe'tod sicato :

41 ¿ Antoy labaymon gaoencod sica ? Et incuanto : Cataoan, macanengnengac comon.

42 Et si Jesús incuantod sicato : Naca la, say pananisiam inlabantoca.

43 Et tampol ya acanengneng, et tinmomboc ed sicato ya inggalangtoy Dios : et aminday ombaley, nen sicutoy anengnengda, inggalangday Dios.

Si Zaqueo á comocortais.

19 ET nen linmoob, linmabas ed pegley na Jericó.

2 Et niay saquey á laquin manngaray Zaqueo á sicutoy manonaanda'ray comocortais et mayaman.

3 Et sineetanton nanengneng si Jesús no siopa, balet agto ayarian nisengeg ed saray daquel á too, ta lapud melag ya inalaguian.

4 Et binmatic ed onaan, et quinmalab ed saquey á quieo á sicomoro, pian sicutoy nengnengento ; ta onlabas diman.

5 Et nen sinmabi Jesús ed saman á petec, liningaoto et incuantod sicato : Zaqueo, mangganatca, onacsebca, ta natan caocolan ya ondaesac dimad abungmo.

6 Et sicato inmacseh á nangganganat et sicatoy inaoa'ton maliqueliquet.

7 Et nen anengnengda'ya, nantalobotob iran nancuan : Linmoob á dinmaoes ed saquey á toon managcasalanan.

8 Et si Zaqueo inmalaguey, et incuantod Cataoan : Nia, Cataoan, say capaldua na saray cayarianco itedcod saray duca ; et no oalay daiset ya acasaolancod siopaman á too, ipaoilco ni mamipat á tobo.

9 Et si Jesús incuantod sicato : Natad sayan agueo sinmabi quilalaban ed sayan abung, ta sicato anac met nen Abraham.

10 Ta sayay Anac na too linma dian mananap tan mangilaban ed saray abalang.

*Alimbaoay sampoloran minas.**

11 ET nen nadngelda'rayan bengatla, intuloyto et inuli'toy saquey'a alimbaoa, lapud sicato oalad asinggued ed Jerusalem ; et lapud inisipdan ngalngali la ompatnag so panariay Dios.

12 Incuanto sirin : Saquey á mablin too linmad saquey á dalin ya araai, pian laenton alaen nipaacad ed sicato so saquey á nanarian, et insan ompaoil.

13 Et nen tinaoagto'ray sampoloran aripento, initdanto'ra na sampolo'ran mina, et incuantod sicara : Mananap cayod saya anggad agco isabi.

14 Balet saramay cabaleyanto sicatoy ginulara et angibaquiray ontomboc ed sicato, á mangicuan : Agmi'ya labay á manarid sicami.

15 Et agaoa, á nen pimmaoil, diad cayari inpangaoa'toy nanarian, impataoagatod sicato'raman ya aripen, ya angitdanto nen samay pilac, pian nacabatantoy nalmoanda.

16 Et say inmuhan linma incuanto : Cataoan, say minam acalmoy sampoloran mina.

17 Et incuantod sicato : Maong, maronong ya aripen ; lapud

* Pilac á caparay talompolo tan duay pisos.

dagdaiset apanmatalcanca, oalay pacaoleymod sampoloran ciudad.

18 Et say comaduan linma incuanto: Cataoan, say minam acalmoy limaran mina.

19 Et incuantod saya met: Sica met manoleycad limaran ciudad.

20 Et saquey á linma incuanto: Cataoan, nia'may minam ya inyatlod saquey á paño:

21 ta tinmacotac ed sica, ta toocan masubeg; alaenmoy agmo inyan, et anienmoy agmo intanem.

22 Et incuantod sicato: Maugues ya aripen, diad sangim so pangocomanod sica. Antam á tooac á masubeg, ya alaencoy agco inyan, et aniencoy agco intanem:

23 ¿aquin sirin ya agmo inted so pila'co ya inpaabangan, pian diad isabic singilencon pati say tobo?

24 Et incuantod saray oalan acaarap: Ecalenyod sicutoy mina, et sicutoy itedyod samay oalaay sampolora.

25 Et sicara incuandad sicato: Cataoan, oala lay sampoloran minato.

26 Siac cuancod sicayo ya anggan siopan oalaan, sicutoy naitdan; ingén say andian, anggan say oala nid sicato, naecal ed sicato.

27 Ingén saramay cabosolco ya agda comon labay á manariac ed sicara, yacadyo'ra dia, et patgueranyo'rad arapco.

28 Et nen naoli'toraya, nanacad ed onaan á linmad Jerusalem.

Inloob á bantog nen Jesús diad Jerusalem.

29 ET agaoa á nen sinmabid asinggued ed Betfage tan say Betania, diad palandey á manngaray Caolivaan, inggangantoy duarad saramay binangatanto,

30 á cuanto: Onlacayod baley ya oalad arap; diman, sano onloobcayo, macaromogcayo naani saquey á quilao ya asno á nisinged, ya ag ni sinapatay toon siopaman; ocharanyo et sicutoy yacadyo dia.

31 Et no oalay mantepet ed sicayo ¿aquit sicutoy ocharanyo? ebatanyo naani onia: Ta say Cataoan sicutoy caocolanto.

32 Et linmaray nibaqui et aromogday onong na incuantod sicara.

33 Et nen oocbaranda'may quilao ya asno, saramay acancaya-rian incuandad sicara : ¿ Aquit oocaranyoy quilao ya asno ?

34 Et incuanda : Lapud sicutoy caocolay Cataoan.

35 Et sicutoy inyacaddad Jesús, et nen niyanda'ray caoesda ed benegtonmay quilao ya asno, insapatday Jesús ed tapeo.

36 Et nen manaacad, inbilocagda'ray caoesda ed dalan.

37 Et lapud sicutato asinggued lad alosadsad na palandey á Caolivaan, aminda'ray binangātato inggaporay nanliquet tan angīgalgalang ed Dios diad baleg á voces nisengēg ed saray amin á macapaquelao ya anengnengda,

38 á cuanda :

Bendito so Ari ya onla diad ngaray Cataoan. Deen diad taoen tan galang diad sancataguian.

39 Nen satan saray arum ed saray Fariseo ed saramay daquel á too incuandad sicutato : Managbangāt, banom iray binangātanmo.

40 Et sicutato immebat et incuantod sicara : Cuancod sicayo á no saraya ag ira comon onesel, saray bato maningāl-ira.

41 Et nen sinmabid asinggued, anengnengtoy ciudad et ninangisanto,

42 á cuanto : ¿ No naamtaanmo comon, diad sayan agueo, so saray nipaacad ed deenmo ! balet natan niamot irad saray matam,

43 ta onsabi'ray agueo ed sica, á saray cabosolmo lictobendaca naani na saray cuta et alarendaca naani, et diad amin á pasen aposandaca,

44 et iguebaraca naanid dalin, tan saray anacmo diad dalem, et ag da naani paoliad sicay saquey á bato diad tapeo na saquey ; lapud agmo nibiig so agueo á cadalaomó.

Say incalinis na templo.

45 ET linmoob ed templo et guinapoanton pinapaoay so saray lumalaco,

46 á cuantod sicara : Oalan nisulat : Et say abungco, sicutato

naani abung na picacasi ; ingén sicayo sicutoy guinaoayo ya obong na saray mataqueo.

47 Et nanbangat ya inagueoagueo diad templo ; ingén saramay manonaanday sacerdote tan saramay escriba tan saramay manonaan ed saray ombaley sineetandan pateyen comon :

48 balet ag ira acaromog na pamaacaran diad panggaoara ; ta saray amin ya ombaley sicutoy calicliquetdan denglen.

Say panaminiag nen Juan.

20 ET agaoad saquey ed saraman ya agueo, nen manbangat ed saray ombaley diad templo tan ipopolongtoy maong á balita, sinmabid sicutato so saray manonaandaray sacerdote tan saray escriba pati saray mamasiquen ;

2 et sicutoy aquisalitaandan nancuan : Ibagam ed sicami :

¿ Diad anton pacaoley so panggaoaanmod sarayan bengatla ? ono ¿ siopay angited ed sica na sayan pacayari ?

3 Et inmebat et incuantod sicara : Siac tepetenco met ed sicayo so saquey á tepet, et ebatandaac :

4 Say panaminiag nen Juan, ¿ nanlapud taoen ono diad saray totoo ?

5 Et ninonnonotdad loobdan dili, á cuanda : No icuantayo : Diad taoen ; cuanto naani : ¿ Aquit agcayo sirin anisiad sicutato ?

6 Balet no icuantayo : Diad saray totoo ; amin ya ombaley topaquenda itayo, ta sinisieran si Juan saquey ed saray profeta.

7 Et inmebat ira ya agda amta no ined.

8 Et si Jesús incuantod sicara : Et siac agco met ibagad sicayo no anton pacapaniari panggaoaancod sarayan bengatla.

Alimbaoa'ray tomatalon á maugues.

9 ET inggapoton incuad saray ombaley so sayan alimbaoa : Saquey á too nantanem na saquey á cauvasan et impaabangtod saray tomatalon, et linmad sananey á dalin diad abayag ya agueo.

10 Et nen panaonto la, angibaqui saquey'a aripen ed saray

tomatalon, pian itdanda na bungay cauvasan ; ingén saramay tomatalon sicutoy pinepecpecda et pinapaoildan anggapoy naaoi'to.

11 Et angibaqui ni sananey'a aripen ; balet saya pinepecpecda tan inaayeoda met, insanda imbaqui ya anggapoy aoit.

12 Et angibaqui ni comatlo ; et pinepecpecda met tan pinata-inanda.

13 Et say cataoay cauvasan incuanto : ¿Antoy gaoaenco naani ? Ibaquic so ana'con inararoc : pagalanganda'ya lagui.

14 Ingén saramay tomatalon, nen sicutoy anengnengda, nansasalitara á cuanda : Saya sicutoy mananaoid ; sicutoy pateyentayo, pian say taoid cayariantayo.

15 Et sicutoy intuldondad paoay na cauvasan, et sicutoy pinateyda. ¿Anto sirin so gaoaen naani cataoay cauvasan ed sicara ?

16 Onla naani et pateyento'rayan tomatalon, et itedto naani cauvasanto ed saray arum. Et nen sicutoy nadngelanda, incuanda : ; Say Dios agto comon yabuloy !

17 Ingén sicutoy sicaray ninengnengto, et incuanto : ¿Anto sirin'yay oalan nisulat :

Say bato ya imbantac na saray manamaalaguey na abung, sicutoy agaoan olo na suyoc ?

18 Amin á napelag ed satan á bato, napisagpisag naani ; ingén diad dinanman á capelaganto naani, sicutoy betaguento naanin singa sapoc.

Say nipaacad ed buis.

19 ET seetan na saramay escriba tan saramay manona-anda'ray sacerdote ya erelen ed saman ya horas ; balet tinacotanda so saray ombaley : ta atalosanda ya inoli'to so sayan alimbaoa á sungpad sicara.

20 Et sicutoy sinisiimda, et nanbaquiray mansiim á nansimpi-simpitan ira, pian sicutoy naereldad saray salita, et pian sicutoy yaoatda ed betang tan oley na gobernador.

21 Et tinepetdad sicutoy á cuanda : Managbangat, amtami á mansalitaca tan manbabangatca á matunong, et agmo aoatey

incatooy siopaman, no ag ingēn ibangātmon tua so dalan na Dios.

22 ¿Niabuloy ed sicami so pambayad na buis ed quienen Cesar ono andi?

23 Ingen sicato, naamtaantoy silibda, et incuantod sicara:

24 Mangipanengnengcayod siac na saquey á denario. ¿Sio-
pay acantalintao tan acansulat ed oalad sicato? Et incuanda:
Si Cesar.

25 Et incuantod sicara: Itedyo sirin ed Cesar so betang nen Cesar, et diad Dios so betang na Dios.

26 Et agda ayarian ya inerel ed saramay salitato diad arap na saray ombaley: et nanquelaoanday eba'to et ag ira immesel.

Saray Saduceo tan say quiolid bilay.

27 ET simmabi'ray arum á Saduceo, á sicaray mancuayan anggapoy quiolid bilay, et tinepetdad sicato,

28 á cuanda: Managbangat, si Moisés insula'tod sicami á no say aguin laqui na saquey á too ompatey'a oalay asaoato et anggapoy anacto, say asaoato alaen comoy aguito, et ipaalague-
yantoy poli so aguito.

29 Oala sirin so pitoran sanaagui: et say pangoloan angalay asaoan bii, et inatey'a anggapoy anac;

30 et sicatoy inala na comadua; et inatey met ya andi anac.

31 Et sicatoy inalay comatlo; et ontan á nansasaguinonod iran amin á pitora, á sicaray inatey'a anggapoy anac.

32 Et diad casungpalan inatey met imay bii.

33 Sano quiolid bilay sirin, ¿siopad sicaray acanasaoa? Ta
sicatoy inasaoa na saray pitora.

34 Et si Jesús incuantod sicara: Saray anac na sayan mundo mangasaoara tan miasaoara:

35 ingēn saray nipasen á manepeg á macarandan ed saman á mundo tan say quiolid bilay na saray inatey, ag ira mangasaoa et ag ira met miasaoa:

36 ta agda la nayari ompatey, ta capadparara na saray angel, et anac iray Dios, ta sicaray anac na quiolid bilay.

37 Balet, satay quiolid bilay na saray inatey, si Moisés

impatnagto, *diad nipaacad ed Zarza*, nen tinaoagtoy Cataoan á Dios nen Abraham, Dios nen Isaac, tan Dios nen Jacob.

38 Ta sicato alioan Dios na saray inatey no ag ingén saray mabilay ; ta manbilay iran amin nipaacad ed sicato.

39 Et inmebat ed sicato so saray arum ed saray escriba, et incuanda : Manangbangat, maong so incuanmo.

40 Et agda la nitapel so angitepet ed sicato na antocaman.

Si Cristo, anac nen David.

41 ET sicato incuantod sicara : ¿ Aquit cuanda á say Cristo anac nen David ?

42 Ta si David met lanlamang cuantod libro'ray Salmos :

Incuay Cataoan ed Cataoanco :

Oniorongcad nicaoananco,

43 Anggad panggaoac ed saray cabosolmo á gagatinan na saray salim.

44 Si David sirin taoaguentoy Cataoan : ¿ Et panon á sicutoy anacto ?

Si Jesús balaoento'ray escriba.

45 ET nen dengdenglen na saray amin ya ombaley, incuantod saray binangtato :

46 Manlicas cayod saray escriba, á calicliquetday manacad ya acacoes na anduquey, tan aroenday pangibano diad saray plaza tan saray nitalonggaring á yorongad saray sinagoga, tan saray manonaan á yorongad saray duypoan ;

47 á sicaray mangacmon ed saray abung na saray bibiin balo, et gaoendan baraan so saray anduquey á dasal ; saraya aotenda naani nagcalalon cadusa.

Say patanid na ducan balon bii.

21 ET nen linmingao, anengnengto'ray mayaman ya ipepe-lagda'ray patanidda diad panangiatolay patanid.

2 Et anengnengto met so saquey á ducan balon bii ya impelagto met diman so duaran maravilis.

3 Et incuanto : Tuan peteg á cuancod sicayo, á sayan ducan balo angipelag na daquel nen sicaran amin :

4 ta amindara nia, diad masuloc ed sicaray *angalaanday* impelagdad patanid ; ingén saya, diad caducaanto, inyanton amin á pantaganon oalad sicato.

Say polong ya inprofeta.—Say gapu'ray irirap.

5 ET nen inbagad sicato na saray arum so nipaacad ed Templo no panoy incaraqueptod saray malimgas á batobato tan patanid, incuanto :

6 Diad sarayan nanengnengyo, onsabi naani agueo ya anggapoy natilac á bato diad tapeo na saquey ya ag naani nagueba.

7 Et tinepetdad sicato, ya incuanda : Managbangat, ¿capigan 'ya ? ¿Et anto naani tanda no onggapu'rayan nagaoa ?

8 Et incuanto : Nengnengyo, ta agcayo comon napalingo : ta daquel naani onsabi diad ngarancon mancian : Siac iman, et asinggued lay agueo ; agcayo ontomboc ed sicara.

9 Et sano narengelyo'ray bacal tan colcol, agcayo natakot ; ta caocolan á sarayan bengatla nagaoa'ran onona ; ingén ag naani onsublay á tampol so panganggaan.

10 Nen satan incuantod sicara : Onalaguey naani nación á mibacal ed sananey á nación, say panarian tan panarian ;

11 et oala naani balbaleg á yegyeg, et diad nambabangil á pasen, eras tan salot : et oala naani nagaoan macapatactacot tan angcacabaleg á tanda diad taoen.

12 Ingén sano ag ni nagaoan amin iraya, erelenda cayo naani et pairapen dacayo et iyaoatdacayod saray sinagoga, tan diad saray panangipangaoan, ya yacaddacayo ed arap na saray arari tan saray macaoley nisengeng ed ngaranco.

13 Et saya nagaoa naani ed sicayo á pamatua.

14 Itatacyo sirid capusoanyo ya agcayo mannunot ya unona no panon naani yebatyó :

15 ta siac itdantacayo naani sangi tan cacabatan, ya agda nayaran lictaran tan sungpaen na saray cabusolyo.

16 Balet sicayoy yaoat na anggan saray amayo, tan agagui tan cacanayon tan cacaaro : et oala naani pateyendad sicayo.

17 Et caguladacayo naani na saray amin á too nisengeg ed ngaranco.

18 Ingen anggan sacsaquey á buec na oloyo ag nabalang.

19 Diad pantepelyo natalimayo naani camareruayo.

Say polong ya inprofeta (caaroman).—

Say baleg ya irirap.

20 INGEN sano nanengnengyoy Jerusalem á nilictob na saray ejercito, amtaenyo á say cabagbagto asingged la.

21 Sicato naani nepeg á yamotda'ray oalad Judea diad saray palandey ; et saray oalad pegleyto, ontainan ira ; et saray oalad uma, ag ira onloob ed sicato.

22 Ta sicarayay agueo na pangibales ; pian nasungpal ya amin so oalaran nisulat.

23 Ingen ; abaguey la'ray malocon tan saray manpapasoso ed saratan ya agueo ! ta oala naani baleg ya irap diad tapeo na dalin tan sanoc ed sayan baley.

24 Et napelag ira naanid tarem na campilan et niacad ira naanin adaquep ed saray amin á nación : et say Jerusalem igatin naani na saray Gentil, anggad casungpal na saray agueoda'ray Gentil.

*Say polong ya inprofeta (caaroman).—Say ipaoil
na Anac na too.*

25 ET oalara naani tanda diad agueo tan bulan tan saray biteuen ; et diad tapeo na dalin irap na saray nación ya antacot , nisengeg ed ongol na dayat tan saray daluyon ;

26 saray totoo napunao ira naani nisengeg ed tacot tan egagueldad saray gaoan onsabid atooan á dalin ; ta say pacayari na saray taoen natenieg naani.

27 Et diad satan nanengnengda naani'yay Anac na too, ya onsabi naanid saquey á lurem á naspot na pacapaniari tan baleg á gloria.

28 Balet sano onggapun nagaoa'rayan bengatla, onnengnengcayo et itanga'yoray oloyo, ta say carondonyo asinggued la.

29 Et incuantod sicara so saquey'a alimbaoa: nengnengyoy quieo ya higos tan saray amin á quieo:

30 sano manolnos ira, nanengnengyo et amtayod incasicayon dili á say tiagueo asinggued la.

31 Ontanyo met, sano nanengnengyo'rayan nagaoa, amtaenyo á say panariay Dios asinggued la.

32 Tuan peteg cuancod sicayo, ya ag naani onlabas yan poli anggad nagaoa'n amin iraya.

33 Say taoen tan dalin onlabas ira naani; ingen saray salitac ag ira onlabas.

Say polong ya inprofeta (caaroman).—Say panagbantay.

34 ET manlicascayo, ompan lanlamang saray pusoyo napa-no'ra ed incasiba tan panagbuec, tan saray pilalec ed sayan bilay: et onsabid sicayo diad casanlilicna so saman ya agueo, á singa saquey á patit:

35 ta ontay isabito naani ed saray amin á manaayam diad tapeo na sancaralinan.

36 Manbantaycayo sirin diad amin ya agueo, et micasicayo, pian narandanyoy nilaban ed sarayan amin ya onsabin nagaoa tan macaalagueycayo ed arap na Anac na too.

37 Et manbabanġat nen saman ya inagueoagueo diad templo; et linabilabin ompaoay ya ontondad palandey á manngaray Caolivaan.

38 Et amindaray ombaley cabcabuasanenday onlad sica-tod'man pian sica toy denglenda;

Say bayad na lipot.

22 ET asinggued nen saman so fiesta na saray tinapay'a andi levadura á manngaray Pascua.

2 Et saramay manonaanday sacerdote tan saray escriba manaanap iray pamaacaran á pamatey ed sicato; ta antacot-da'ray catooan.

3 Et sinmelep si Satanás ed Judas, ya inngaray Iscariote, á saquey ed bilangda'ray labindua.

4 Et linma et aquisalidad saramay manonaanday sacerdote tan diad saray capitan, no panon naani pangiaoa'tod sicato diad sicara.

5 Et linmiquet ira et nanpapaknaanda á sicutoy itdanday pilac.

6 Et insipanto et nananap na maong á pangiaoa'tod sicato diad sicara, sano anggapoy daquel á too.

Say caonoran á Pascua. Say masantos á panamangdem.

7 ET sinmabi agueo na saray tinapay'a andi levadura á sicutoy pancaocolay Pascuan ibagat.

8 Et imbaquito'ra di Pedro tan Juan, ya incuanto: Onlacyo, mangitadiacayoy oncanad sicutayo diad Pascua pian mangán itayo.

9 Et incuandad sicato: ¿Ined so labaymon pantadiaanmi?

10 Et incuantod sicara: Nia, sano, macaloobcayod ciudad, naromogto cayo naani saquey á too á nanaoit na sambuyog á danum: sicutoy tomboquenyong anggad abung á loobanto.

11 Et icuanyo naanid acanquied abung: Say Managbangat cuantod sica: ¿Ined so caoalaay pananangcailian á silid á pangnanancoy pasco pati saray binangatanco?

12 Et ipanengnengto naanid sicayo so saquey á baleg á silid ya ataguey tan aparacpan: tadiayod'man.

13 Linmara sirin, et aromogda onong na imbagatod sicara; et intadia'ray pasco.

14 Et nen simmabi horas, dimmongo; et diad dulang ibato'ray apóstol.

15 Et incuantod sicara: Nanpilalecancoy baleg so mican ed sicayo ed sayan pasco, natan ta agac ni manirap:

16 ta cuancod sicayo ya agco la canen, anggad nasungpal ed panariay Dios.

17 Et angalay saquey á copa et cayari impisalama'to, incuanto : Alaenyo'ya, et sicutoy apagapaguenyod sicayo :

18 ta cuancod sicayo ya agac la oninom manlapud natan na bungay uvas, anggad isabi panariay Dios.

19 Et angalay tinapay et cayari impisalama'to pinisagto et intedtod sicara á cuanto : Saya, sicutoy lamanco, á niited nisengeg ed sicayo : gaoayo'ya á pacanonnotad siac.

20 Et ontan met imay copa, diad cayari impangdemda, incuanto : Sayan copa sicutoy balon sipan diad dalac á naibong nisengeg ed sicayo.

21 Ingen nia, say limay mangiaoat ed siac oalan carongoc diad dulang.

22 Ta diad catuaan, sayay Anac na too onla á singa oalan inguetad ; ingen ; abaguey la'tay toon mangiaoat !

23 Et guinapoandan inanap ed sicara met lanlamang, no siopa casid sicaray manggaoa naani nia.

Say cabalbalgan sicutoy camelamelagan.

24 ET agaoad sicaray saquey á siblangan : no siopad sicara so singa cabalbalgan.

25 Et sicato incuantod sicara : Saray arari na saray naciones panoleyandara *so nacionda* : et saray oalay pacapaniarid sicara, ningaran iray Manamaabig.

26 Ingen sicayo, alioan ontan ; no ag ingen, say cabalbalgad sicayo sicato comoy singa camelamelagan ; et say manonaan sicato comoy singa aripen.

27 Ta ¿ siopay balbaleg, say ondongod dulang. ono say manservi ? ¿ Alioa casin say ondongod dulang ? Ingen siac ed sicutoy singa manservi.

28 Bangbalet sicayo'ray nansiansiad siac ed saray incatoc-toc-soc ;

29 et siac ipataoidcod sicayo so saquey á panarian á singa impataoid nen Amac ed siac,

30 pian macapican tan macapiinomcayo diad dulangcod panarianco ; et onyorongcayo naani ed saray trono, ya ocomenyo'ray labinduan poli na Israel.

Napaamtaay Pedro.

31 INCUAN met na Cataoan: Simon, Simon, nia si Satanas quinereotocayo pian nalipi'tocayon singa trigo;

32 ingeni siac inquereoantaca pian say pananisiam ag comon onculang: et sica sano macapagbabaoica la, pabisqueguenmo'ray agaguim.

33 Et incuantod sicato: Cataoan, maparaanac ya ontomboc ed sica anggan diad panangipangaoan tan say patey.

34 Et incuanto: Pedro, cuancod sica á say lalong ag naani oncucaoc natan, anggad mamitlo naanin pangiburim á cabcatmoac.

Saray duaran campilan.

35 ET incuantod sicara: Nen saman imbaquitacayo ya andi bolsa tan supot, tan andi sapin, ¿oalay antocaman á nanculanḡanyo? Et incuanda: Anggapo.

36 Et incuantod sicara: Ingen natan, say oalay bolsato, alaento, et ontan met so supot, et say andian, ilacotoy colibentobento et manalio na campilan.

37 Ta cuancod sicayo, á caocolan á nasungpal ed siac so sayan oalan nisulat: Et nibilang ed saray maugues, ta say *nisulat* á nipaacad ed siac oalay casungpalanto.

38 Nen satan incuanda: Cataoan, niay duaran campilan. Et sicato incuantod sicara: Sarag la.

Si Jesús dimad Getsemani.

39 ET pimmaoay et linma, singa caugaliano, ed palandey na saray Olivo: et saray binangatanto timmomboc ira met ed sicato.

40 Et nen sinmabid saman á pasen, incuantod sicara: Micasicayo pian agqui onloob ed tocso.

41 Et sicato simmian ed sicara ed singa nagaoat na saquey á baton itupac; et timmalimocod et aquicasi,

42 á cuanto : Ama, no labaymo, yaraoim yan copa diad siac ; anggaman ontan, alioan say linaoac so nasungpal, no ag say linaoam.

43 Et pimmatnag ed sicato so saquey'a angel na taoen ya amabisqueg ed sicato.

44 Et sanen manpapanabos, aquicasi marmarlang : et say ling'e'to singa angcacabaleg á tedted na dala á simmaclayat anggdad dalin.

45 Et nen immalaguey ed nanpicasianto, linmmad saray binang'atanto et aromogto'ra ya acauguip niseng'eg ed caerme-nan,

46 et incuantod sicara : ¿ Aquit nauguip cayo ? Onalaguey-cayo, et micasicayo, pian agqui onloob ed toco.

Incaerel nen Jesús.

47 SANEN pelesto nin mansasalita, nia la'ray catooan ; et samay manngaray Judas, saquey ed saramay labindua, sicatoy onaad sicara ; et immasinggued ed Jesús pian sicatoy ang'oban to.

48 In'gen si Jesús incuantod sicato : Judas, ¿ diad saquey'a ang'ob yaoatmo'yay Anac na too ?

49 Et nen anengneng na saray oalan aquiolop ed sicato so nagaoa, incuanda : Cataoan, ¿ sugatenmid campilan ?

50 Et saquey ed sicara sinigba'toy saquey'a aripen na macaoleyda'ray sacerdote, et pining'altoed sicato so layag á nicaoa-nan.

51 In'gen imnebat si Jesús et incuanto : Yabulo'yo ed sicara anggan saya. Et dinioi'toy layagto et sicatoy tinambalto.

52 Et si Jesús incuantod saray macaoley na saray sacerdote tan saray macaoley na Templo tan saray mamasiquen á linmad sicato : ¿ Singa diad saquey á mataqueo, pimmaoaycayon acaayura tan acapecpec ?

53 Nen oalaac ed sicayo diad Templo ya inagueoagueo agyo inunat iray limayo á pang'erel ed siac ; in'gen sayay horasyo, tan say pacapaniari na saray bilun'get.

Si Pedro iburitoy Jesús.

54 ET nen sicutoy inerelda, sicutoy inyacadda tan inloobdad abung na manonaanda'ray sacerdote. Et si Pedro timmomboc ed sicara diad araoi.

55 Et nen anelsel iray apuy ed pegley na patio, et immiorong iran linnibed, aquioryong si Pedro ed sicara.

56 Et nen anengneng na saquey á bii ya aripen ya aquioryong *ed asinggued* ed apuy, sicutoy binidbidto, et incuanto: Saya saquey met ya ibato.

57 Ingen imburiton incuan: Bii, sicutoy agco cabcabat.

58 Et diad naogonoyan, sicutoy anengneng na sananey et incuanto: Sica met saqueycad sicara. Ingen si Pedro incuanto: Too, alioaac *á saquey*.

59 Et nen apalabas so singa saquey horas, pinaletay saquey á pinatuaton nancuan: Peteg á saya nanaya'met ed sicato, ta sicato taga Galilea.

60 Ingen si Pedro incuanto: Too, agco amta'tay cuanmo. Et dingan, nen mansasalita nin lanlamang, á say lalong quinmucaoc.

61 Et linmingao so Cataoan et nilinguistoy Pedro: et si Pedro anonotantoy salitay Cataoan, ya incuantod sicato: Sano say lalong ag ni oncucaoc natan, iburimoac á mamitlo.

62 Et pimmaoay et nannangis na ampait.

Si Jesús diad arap na Sanedrin ono singbatanda'ray sacerdote na saray Judio.

63 ET saramay totoon acaegnad sicato, linudlureyda et quincabilda.

64 Et pinepetday matato'ra, á cuanda. Parlesanmo: ¿siopay angabil ed sica?

65 Et daquel ni sananey'a insalitarad sicato á mabanday á panludlurey.

66 Et sanen cabuasan la, nantitipon iray mamasiquen na saray ombaley, saray manonaandaray sacerdote tan saray escriba et inyacaddad singbatanda,

67 ya incuanda : ¿Sica so Cristo? Ibagam ed sicami. Inġen incuantod sicara : No ibagac ed sicayo, agyo naani sisiaen :

68 et no ontepe'tac met, agyoac met ebatan.

69 Inġen manlapud natan sayay Anac na too onyurong naanid nicaonay pacapaniari Dios.

70 Et incuandan amin : ¿No ontan, sicay Anac na Dios? Et sicato incuantod sicara : Cuanyon siac.

71 Nen satan incuanda : ¿Anto ni pancaocolantayoy pamin-tuaan? Ta sicutayoy met lanlamang nadngeltayod sangito.

Si Jesús diad arap nen Pilato tan si Herodes.

23 ET immalaguey iran amin et inyacaddad arap nen Pilato.

2 Et guinapoandan indalem á cuanda : Saya aromogmi á dederalentoy baleymi et isebeltoy pangited na buis ed Cesar et cuanton sicutoy Cristo, *tan* Ari.

3 Et si Pilato tinepe'tod sicuton incuanto : ¿Sicay Ari na saray Judio? Et sicato immebat, et incuanto : Sica *ontan* so cuanmo.

4 Et si Pilato incuanto ed saray macaoleyda'ray sacerdote tan diad saray totoo : Anggapoy casalanan á naromogcod sayan too.

5 Inġen ipaaetdan siansia á cuanda : Gogoloentoy ombaley, á manbabangāt ed amin á Judea, et guinmapon nanlapud Galilea, *sinmabin* angga dia.

6 Et si Pilato, nen narengelto'ya, tinepe'to no samay too et taga Galilea.

7 Et caamtaton sacop nen Herodes, sicutoy imbaquito'd Herodes, a sicutoy oala met ed Jerusalem ed saraman ya agueo.

8 Et si Herodes, nen nanengnengtoy Jesús, nanliquet na baleg, ta abayag lan pilalecton napinengnengan ; ta nadngeltoy nasasalita *nipaacad* ed sicato, et pialagadton naneng-neng á manggaoay saquey á macapaquelao.

9 Et tinepetantoy daquel á salita ; inġen sicato anggapoy inyeba'tod sicato.

10 Et immalaguey iray macaoleyda'ray sacerdote tan saray escriba á sicutoy indalemndan impaaoet na baleb.

11 Et si Herodes pati saray sondaloto sicutoy minudmurato et nan-galaoanto á sicutoy-quinaoesanto na saquey á mablin caoes ; et sicutoy impaoilton imbaquid Pilato.

12 Et nancaarora di Pilato tan Herodes ed saman met lanlamang ya agueo, ta sanen inmuna manbobosolan ira.

13 Et si Pilato tiniponto'ray macaoleyda'ray sacordote, saray macaoley tan saray ombaley,

14 et incuantod sicara : Impatnagyd siac yan too á singa mandederal ed saray ombaley ; et nia á siac nen tinmepetac diad arapyo, anggapoy casalanen ya aromogcod sicato ed saray pangidalemangyod sicato :

15 et anggan si Herodes ; ta impaoilto ya imbaquid sicami : et nia, ya anggapoy guinaoato á maneped ed pamatey.

16 Sicato sirin so ibolosco, diad cayari cadusato.

17 (Ta oalay pancaocolanton mangibolos ed sicara na saquey á balod diad sinansaquey á liquet.)

18 Ingen naningal iran amin á nancacasaquey, ya incuanda : Ecalenmo'ya, et ibolosmod sicami si Barrabas :

19 á sicutoy nibantac ed panangipangaoan nisengeg ed saquey á golo ya agaoad ciudad, tan nisengeg ed saquey'a impamatey.

20 Et si Pilato inumanto'ran aquisalitaan á labayton ibolos si Jesús ;

21 ingen naningal iran nancuan : Paipasacmo, paipasacmod cruz.

22 Et incuantod sicara diad pitlo : ¿ Aquin anto tay maugues á guinaoay sayan too ? Anggapoy casalanen á *pangiqueteray pamatey* ya aromogcod sicato : sicato naani dusaenco sirin, insanco ibolos.

23 Ingen sicara impasootdad balbaleb ya ingal á quequereenda á nipasac comod cruz. Et saray ingalda binmisqueg.

24 Et si Pilato inguetedton nagaoay quereoda.

25 Et imbolostod sicara so samay nisecced diad panangipangaoan nisengeg ed golo tan saquey'a inatey, a sicutoy quinereoda ; balet inyaoa'toy Jesús diad linaoara.

Si Jesús diad dalan na Golgota.

26 ET nen sicutoy inyacadda, inala'ray saquey á manngaray simon á taga Cirene, á nanlapud uma, et impasacbatdad sicutato so cruz, pian itomboctod Jesús.

27 Et mantomboc ed sicutato so daquel a caraclay ombaley, tan bibii, á nanangisanda tan aabagueyenda.

28 Ingen si Jesús, nen linmingao ed sicara, incuanto : Anac na Jerusalem, agyoac nangisan, balet nangisanganyo ingen so incasicayon dili, tan saray anacyo.

29 Ta nia ya onsabiray agueo á cuanda naani : Mapalad iray lupes, tan saray egues ya ag nananac, tan saray pagueo ya ag nanpasoso.

30 Diad satan gapoanda naani mansalidad saray palandey : Ompelagcayod sicami. Et diad saray pocdol : Sacobanyo camí.

31 Ta no diad quieo ya ambasa gaoaenda'rayan bengatla, ¿diad amaga, anto naani nagaoa ?

Say impangipasac.

32 ET inyolopda met ed sicutoy duaran mataqueo, pian pateyendara.

33 Et sanen macasabirad pasen á manngaray Lapislapis, sicutoy impasacdadman ed cruz, tan saramay mataqueo ; saquey diad nicaoanan, et saquey diad nicaoigui.

34 Et si Jesús incuanto : Ama, perdonaenmora, ta agda amtay gaoaenda. Et nen apagapaguendara'may caoesto, nappalaran ira.

35 Et saray ombaley acaalaguey iran maniimaton ; et saray macaoley sicutato met so linudlureyda, á cuanda : Saray arum inlabanto'ra : ilabanto comon sirin so incasicato, no saya so Cristo na Dios, á pinilito.

36 Et sicutoy linudlurey met na saray sondalo, ya onasing-gued ira et iitdanday toca,

37 et cuanda : No sica so Ari na saray Judio, ilabanmoy incasican dili.

38 Et oala met ed oloanto so saquey á sulat :

SAYA SICATOY ARI NA SARAY JUDIO.

39 ET saquey ed saramay mataqueo á nibitin, sicutoy ludlureyento, á cuanto : ¿ Alioan sica so Cristo ? Ilabanmoy lamanmo tan sicami.

40 Ingen inmebat imay saquey, et sicutoy nanpasnocanto, ya incuanto : ¿ Et sica agmo ni antacot so Dios, anta oalaca ladocoman ?

41 Et sicata, tuan peteg, á manepag ya aotenta so capetecanda'ray gaoata ; ingen saya anggapoy maugues á guinaoato.

42 Et incuanto'd Jesús : Cataoan, nonotenmoac, no onsabiced panarianmo.

43 Et incuanto'd sicato : Tuan peteg á cuancod sica, á natan oalacad siac diad Paraiso.

44 Et singa la comanem so horas nen saman, et simmabi saquey á bilunget diad tapeo na sancadalinan anggad horas á comasiam.

45 Et say agueo binmilunget. Et say sacbong na Templo apilat ed pegley.

46 Et si Jesús naningal ed baleg á voces et incuanto : Ama, diad saray limam so pangimatalcancoy camareruac. Et nen abitla to'ya, inyaoá'toy camareruato.

47 Et nen anengneng na centurion so agaoa, inggalgalangtoy Dios, ya incuanto : Tuan peteg á sayan too matunong.

48 Et amindaranmay daquel á too á nantitipon ed sayan nenengnengen, nen anengnengda'man ya agaoa, pimmaoil ira á dinudugalдарay capagueoanda.

49 Et amindaranmay cabcaba'to tan saramay bibii á timmomboc ed sicon nanlapud Galilea, acaalaguey irad araoi ya onnenengneng ed sarayan agaoa.

Say loboc nen Jesús.

50 ET niay saquey á laqui á manngaray José, á consejero, laquin maong tan matunong,

51 (sicato agto inmabobon ed nanpapacnaanda tan guinaoara), saquey á taga Arimatea, ciudad na saray Judio, á manaalagad met nen saman na panariay Dios :

52 sayan too linmad Pilato et quinereotoy laman nen Jesús.

53 Et inepasto, et sicutoy pinunggostod saquey'a ules : et sicutoy inyantod saquey á loboc á baton quincotay pico ya agni angiponponan.

54 Et agueo nen samay Panagtadia, et ngalingali manliooad sabado.

55 Et saramay bibii ya aquiolop ed sicon nanlapud Galilea, timmomboc ira met, et anengnengday loboc tan no panoy impangiad lamanto.

56 Et pimmaoil ira et nantadiaray balingit tan ungüento ; et narpainaoa'rad sabado, onong ed gangan.

Say inquiolid bilay.

24 ET diad unonan agueo ed simba, diad cabcabuasan linmarad loboc, ya inyacadda'ray balingit ya intadiara.

2 Et aromogday baton caput na loboc ya agalao.

3 Et limmob ira et agda aromog so laman nen Jesús á Cataoan.

4 Et agaoa, á sanen oalaran niquelaoad saya, nia á timmondad abayda so duaran laqui á nancaoes na macapulag :

5 et lapud atactacot ira intoecday luparad dalin, et incuandaranmay lalaquid sicara : ¿ Aquit anapenyod saray inatey so mabilay ?

6 Andi dia, no ag ingen inmoli lad bilay : nonotenyo so incuantod sicayo, sanen oala nid Galilea,

7 á cuanto : Caocolan á sayay Anac na too niyaoat ed saray lima na saray totoon managcasalanan, tan nipasac ed cruz, tan onolid bilay diad comatlon agueo.

8 Et anonotanda'ray salitato,

9 et pimmaoil iran nanlapud loboc, et impacabatdan amin iraya ed saramay labinsauey tan amindaray arumin sananey.

10 Et sicara di Maria Magdalena, tan Juana tan Maria ya

ina nen Santiago, tan saray arum á bibii ya ibara : inulitdara-
yan bengatla ed saray apóstol.

11 Et sarayan salitara, impasendaran lurey et agdara sinisia.

12 Ingen immalaguey si Pedro et binmatic á linmad samay
loboc : et sanen yinmoco et ninengnengto, anengnengto'ray
caoes lambengat : et pimmaoil á manquelquelao ed sayan
agaoa.

Saray duaran binangatan diad dalan ed Emmaus.

13 ET nia, say duarad sicara linmarad saman met lanlamang
ya agueo ed saquey a baley, a manngaray Emmaus ya araoid
Jerusalem na duaran legua

14 Et mansalsalitaran dua nipaacad ed saramay amin á
bengatlan agaoa.

15 Et agaoa, á nen mansasalitara, tan mantetepetan ira, si
Jesús met lanlamang immasinggued et aquiolop ed sicara.

16 Balet saramay matara asaniban, pian sicutoy agda na-
nengneng.

17 Et incuantod sicara : ¿ Antorayan tongtong so sasalitaen-
yon dua, lelegyon manaacad ? Et tinmondaran marermen so
lupara.

18 Et inmebat so saquey, á manngaray Cleofas, et incuantod
sicato : ¿ Sica lambengat so limmabas ed Jerusalem ya agmo
amtaray bengatlan agaoadman ed sarayan agueo ?

19 Nen satan incuantod sicara : ¿ Anto'ran bengabengatla ?
Et incuandad sicato : Saray nipaacad ed Jesús á Nazareno, á
sicutoy laqui á profeta nen saman, macapaniari ed gaoa tan sali-
ta diad arap na Dios tan amin ya ombaley :

20 tan no panoy inpangiaocat ed sicato na saray macaoley-
daray sacerdote tan saray macaoleytayo, pian nadusan ompatey,
tan say inpangipasacad cruz ed sicato.

21 Balet sicami aalagdenmi nen saman á sicato comoy
manondon ed Israel ; bangbalet, tan arum nid saraya,
comatlo'yan agueo la nanlapud incagaoa na sarayan bengatla.

22 Anggan saray arum á bibii ed saray ibibami, inpan-

quelaodacami, á sicara, niman nen agni cabuasan, linmarad loboc ;

23 et nen agda aromog so lamanto, pimmaoil iran nancuan ya acanengneng iray saquey á pasingaoey na saray angel, á sicaray nancuan á sicato mabilay.

24 Et linma'ray arum ed saray ibibami diad loboc, et aromogda onong na incuandaranmay bibii ; ingén sicutoy agda anengneng.

25 Et incuantod sicara : ; Oh totoon andi pacatalos tan nanpusoy atarao á manisiad saray amin ya inbaga na saray profeta.

26 ¿ Ag casi caocolan nen saman á si Cristo acoento'rayan bengatla tan onloob ed gloriato ?

27 Et nen guinapoanto nanlapud Moisés tan saray amin á profeta, impalioaoatod sicara so saray bengatlan nipaacad ed sicato ed saray amin á Sulat.

28 Et asinggued larad baley a laenda, et sicato guinaoato á singa onlad araoi.

29 Ingen sicara sicutoy pinocpocandan pinasoot á cuanda : Ontila'cad sicami ta labi la et say agueo onselec la. Et sicato limmob ya aquilad sicara.

30 Et agaoa á nen aquirongod sicara diad pananganan, inalatoy tinapay, et binendicionanto, et pinisagto insanto inted ed sicara.

31 Et alucasan iray matara et sicutoy abidbidda ; et sicato inmandid saray matara.

32 Et incuandad sicaran dili : ¿ Ag dinmalang so pusota diad loobta, niman nen peleston mansasalitad sicata diad dalan, tan niman nen ipalioaoatod sicutay Sulsulat ?

33 Et immalaguey irad saman met Janlamang ya horas, et pimmaoil irad Jerusalem, et aromogdaray labinsaquey'a atiptipon, ta saray oalan aquiolop ed sicara,

34 á cuanda : Inmolid bilay so Cataoan á tuan peteg, et pimmayaoad ed Simon.

35 Et tinongtongda so saray agaoad dalan, tan no panon so inpacabidbiddad sicato nen pinisagtoy tinapay.

Impayaoad nen Jesús ed saray labinsaquey ya Apóstol.

36 ET nen pelesdan sasalitaen irayan bengatla, sicato imma-laguey ed pegleyda et incuantod sicara : ¡ Deen ed sicayo !

37 Inġen sicara atalagnao tan atactacot ira, et inisipdan acanengneng iray saquey'a aniani.

38 Balet sicato incuantod sicara : ¿ Aquit natactacotcayo, tan aquit naguyod iray canonotad saray pusoyo ?

39 Nengnengyo'ray lima tan salic, ta siac á peteg : carapa-senyoac et nengnengyo ; ta say camarerua anggapoy laman tan poquelto, á singa nanengnengyon oalad siac.

40 Et nen abitlato'raya, impanengnengtod sicara so saray lima tan salito.

41 Et nen agda ni sisiaen nisengeg ed liquet, tan manquel-quelao ira, incuantod sicara : ¿ Oadiay bengatlan nayaran canen ?

42 Et insaclangdad sicatoy arum na saquey'a ican ya incalot.

43 Et sicatoy inalato et angan diad arapda.

44 Et sicato incuantod sicara : Sarayay salita ya inbagac ed sicayo, nen oalaac nid sicayo : A caocolan á nasungpal so amindaray bengatlan nisulat nipaacad ed siac diad Gangan nen Moisés, tan diad saray profeta tan saray Salmos.

45 Nen satan linucasantod sicaray canonotanda, pian nata-lusandaray Sulat ;

46 et incuantod sicara : Ontay oalan nisulat á si Cristo manirap, tan onolid bilay ed saray inatey diad comatlan agueo ;

47 et nipolong ed ngaranto so pagbabaoi tan say caecal na saray casalanen ed saray amin á nación, manlapud Jerusalem.

48 Et sicayo'ray macatasid sarayan bengatla.

49 Et nia, ibaquic so sipan nen Amac ed sicayo ; inġen manayamcayo ed ciudad á Jérusalem, anggad nacaoesancayo ed pacapaniarin manlapud taguey.

Say intocotoc.

50 ET inyacadto'rad uma anggad arap na Betania, et intangayto'ray limato, et binendicionanto'ra.

51 Et agaoa á nen bebendicionanto'ra, tinmainad sicara : et nipataguey ed taoen.

52 Et sicara, cayari inpan̄igalgalangdad sicato, pimmaoli irad Jerusalem á sililiquet na baleg :

53 et nanayam ira laos ed Templo ya an̄igalgalang tan aquisalsalamat ed Dios.





UNIV. OF MICHIGAN,

DEC 3 1960

UNIV. OF MICHIGAN

DEC 2 1964





UNIVERSITY OF MICHIGAN



3 9015 03534 8211

